

本

州

網

目

本

草

綱

目

拾

遺

光緒十一年六月合
肥張氏味古齋重校
刊瑞安孫衣言署檢

重刻本草綱目拾遺序

世傳靈樞素問爲黃帝岐伯相與問答之書而神農
氏嘗百草別其性味以療民疾苦爲本草經其詳不
可得知要之皆有聖人之微言非後世所能僞爲也
古之帝王生有神靈之德其治天下之具自政刑禮
樂文章制度之外至於民之疾痛疴癢亦必引爲一
身休戚而其盡物性以利民生必至此而後備也神
農本經所列金石草木之可以爲藥者爲上中下三
品三百六十五種至陶隱居增爲別錄亦三百六十

五種唐宋以來代有增益明李氏時珍博綜諸家著
爲綱目蓋綦備矣而近人錢塘趙氏學敏又爲之拾
遺以補李氏之所未備然以予所見深山窮谷里嫗
巷嫂謠俗相傳有極其鬼瑣而甦起沈痼乃與參朮
同功者然則天之生物以利民用殆非書之所能盡
也戚友合肥張君又堂旣刻善化鮑氏驗方新編今
年夏復刻李氏綱目趙氏拾遺二書將訖功屬予序
發其意又堂始壯歲時提偏師鏖戰海上當其兩陣
相接殺人如麻未嘗毫髮以動其心及其功成而退

綸巾野服徜徉里閭則若惟恐人之不遂其生者廣
求活人之書刻而傳之其用心不亦善哉且夫天之
愛人至矣陰陽寒暑之偏喜怒哀樂之感不能使民
之無生疾而常恃有物以治之蓋有一疾卽有一藥
也有一疾卽有一藥則必得是藥乃可癒是疾也今
之爲技術者知希重糈而已其於神農黃帝之書未
必能盡讀也讀之未必能盡通也金石草木之類陳
於前而莫能舉其名況其味與性乎況其於疾之當
與否乎則其殺人也與白刃何以異天下之大猶之

一人之身也大變則大材生焉小變則小材生焉其變百出而不窮其材固百用而不竭也草木金石之於治疾未嘗見其有時而不給也治之以其所與私餌之以其所爲憙以巫爲師惟鬼之祈豕苓桔梗紛來乘時而三年之艾或終身無以致之嘻其爲操術也危矣又堂雖不與其事其能無惄然爲之思乎瑞

安孫衣言

利濟十二種總序

先君子昔艱於嗣嘗至京口遇異人云準君相無後
若行利濟事可得子及總齶下砂時海溢淹斃者不
下數十萬先君悉爲設法撈埋秋疫癘繼作又爲捐
俸延醫合藥以療疾賴生者數萬人更詳創築塘當
事轉題得奉 俞旨允行時各場皆被潮災攀轅借
寇自下砂石堰穿山鳴鶴龍頭等凡七邑皆一身董
其事塘成名曰利濟是年秋潮驟至迄無害後由永
春司馬宰尤溪甫生子昆季二人乳字之曰利濟退

居之日用以名其堂此利濟所由昉也先君嘗欲以
一子業儒一子業醫故楷弟自幼年讀經書外兼課
以靈素難經及傷寒論諸書暇時復命默畫銅人圖
以嬉戲貯甲乙卷於養素園區地一畦爲栽藥圃予
弟兄春秋輒寢食其中令弟銳意岐黃用承先志雖
未敢自信出以應世然親串間有請診者服其藥無
不應手愈居恆喜著書所纂有百草鏡八卷救生苦
海百卷皆言中肯綮解洞元微誠有裨於斯道者不
淺予自愧謏庸蹶泔勺水會何當大雅之目者乃欲

爲瓦釜鳴耶憶自髫齡性好博覽凡星厯醫卜方技
諸學閒亦涉獵之意有所得卽欣欣忘倦鈔撮成帙
納之篋久而所積溢篋外束庋閣上纍纍幾千卷近
亦稍自厭棄閒歲檢閱其無用者焚之此十二種內
祝由串雅二稿己丑春已取投之燄時因小輩攫去
乃姑存焉自甲戌歲始成醫林集腋從隣人黃販翁
家閱所藏醫書萬餘卷參以舊存江閩秘本集其屢
驗者名之曰腋見精選之匪易也戚好中有以驗方
見示及游篋所得歷年頻增爲傳信方乙亥春湖南

汪子師儻予舍居見其案頭有祝由本汪君用之素
驗暇日因借錄一通後又得張氏本及儒門事親萬
薛二家抄採擇試之刪其妄而存其效且便於行者
以爲山居一時不能備藥石之助作祝由錄驗余素
有書癖日不給焚膏繼之恐堂上呵禁嘗篝燈帷中
藏書夜觀煤積翠帳皆黑丙子秋患目幾廢息視不
啟者六月乃愈因作囊露集較瑤函銀海龍木論明
鏡箋自謂過之以囊露名者蓋取囊柏葉露可治目
意宗子柏雲挾華扁術行遊名都戊寅航海從中山

歸相關已八載矣投刺來謁予時讀禮家居館之三
月閒與談有關其謬處柏雲故虛懷士頗以予言爲
然慷慨出其歷游方術頂串諸法合予養素園簡驗
方本彙編之串而曰雅知非江湖俗技之末也鏡水
居士隱元上人皆擅點茆法素與何竹里善庚辰予
讀書西山寺回峰精舍適竹里避暑至與之結河朔
飲會一面焉因得聞制伏鼎火諸說予用其法於諸
科升降藥中體不耗而功倍捷因集古來升降諸方
參以製法爲秘要一書而以藥性之奇制者爲元解

以見本草之用爲最廣昔高濂有珍異藥品而搜奇
未全瀕湖著本草綱目而後出未補悉爲續之一曰
奇藥備考一曰綱目拾遺均各有義例焉夫本草之
成書自神農本經桐君藥錄而下繼作者不下數十
家固無乎不備矣然所重者藥性則論性者多考其
真僞若何辨其地產各別如地黃有三才之判天冬
有五嶽之分縱李氏已略言之而究之風俗異宜古
今殊轍百餘年來未有不轉易者況乎婆娑公鬚名
隨俗改丹經媚帖藝以途分苟隱僻或謝未知將名

稱亦云素昧乎有不爲所竊笑者幾希因作本草話
花藥小名錄至於攝生閒覽爲導引卻病之方坎離
栽接之說何取哉嗟乎學期適用醫可通元殊慚襪
線之才敢詡金鍼之秘用是述其緣起贅於簡端他
日倘能將靈素脈經傷寒有見解處著爲醫論續增
十種合吾弟所著二書並梓之爲利濟後集斯予之
志也夫庚寅春仲上澣六日恕軒趙學敏序

利濟十二種全目

醫林集腋十六卷

養素園傳信方六卷

本草綱目拾遺
祝由錄驗四卷

囊露集四卷

本草話三十二卷

串雅八卷

花藥小名錄四卷

升降秘要二卷

攝生閒覽四卷

藥性元解四卷

奇藥備考六卷

本草綱目拾遺十卷

通計一百卷

本草綱目拾遺小序

客有問於予曰聞子有綱目拾遺之作乎予曰然客曰瀕湖博極羣書囊括百代徵文考獻自子史迄稗乘悉詳採以成一家之言且其時不惜工費延天下醫流遍詢土俗遠窮僻壤之產險探仙麓之華如癸辛雜識載押不蘆輟耕錄載木乃伊瀕湖尚皆取之亦何有遺之待拾歟觀子所爲不幾指之駢疣之贅歟余曰唯唯否否夫瀕湖之書誠博矣然物生旣久則種類愈繁俗尚好奇則珍尤畢集故丁藤陳藥不

見本經吉利寄奴惟傳後代禽蟲大備於思邈湯液
復補於海藏非有繼者誰能宏其用也如石斛一也
今產霍山者則形小而味甘白朮一也今出於潛者
則根斑而力大此皆近所變產此而不書過時罔識
將何別於百粵記中之產元黃基治腫毒孫公談圃
之用水梅花治痢疾後且莫知爲何物安辨其色味
哉矧夫烟草述於景岳燕窩訂於石頑閱繆氏經疏
一編知簡誤實爲李氏之功臣則予拾遺之作又何
有續脛重跖之虞乎客應曰可卽命予弁斯言於首

以爲敘乾隆乙酉八月錢塘趙學敏恕軒題於雙硯
草堂

凡例

一是書專爲拾李氏之遺而作凡綱目已登者或治療有未備根實有未詳仍爲補之

一藥目本有次第綱目分類自不得不繁茲概從簡以爲例

一用藥取其便也珍貴罕見之物奚取焉然以天地閒瓌奇神異何所蔑有倘遇其物而莫能名何如備其說之猶可考也載之以助博物者用

一拙集雖主博收而選錄尤慎其中有得之書史方

本草綱目拾遺
志者有得之世醫先達者必審其確驗方載入并
附其名以傳信若稍涉疑義卽棄勿登如銀汗釘
霜雞丹蜂溺雲根石雄黃油之類不乏傳方俱難
責效有似此者概從刪削甯蹈缺略之譏不爲輕
信所誤

一草藥爲類最廣諸家所傳亦不一其說予終未敢
深信百草鏡中收之最詳茲集閒登一二者以會
種園圃中試驗故載之否則甯從其略不敢欺世
也

一綱目無藤部以藤歸蔓類不知木本爲藤草本爲蔓不容牽混茲則另分藤蔓部綱目無花部以花附於各種本條然其中有錄其根葉反棄其花者或僅入其花名又無主治者因爲另立花部其枝梗有補遺者亦附其後如梅花附梅梗之類可以例推

一綱目中有僅列其名無主治者如梅花龍涎悉爲錄驗增入有考核未詳者他日擬作待用本草將宇宙可入藥之物未經前人收採者合之另爲一

書以俟博訪於後之君子

一綱目有誤分者有誤合者如草部既列鴨跖草專條何於雜草內又列耳環草豈以其有碧蟬兒花之名誤分也不知碧蟬花卽鴨跖草又於長生草下附紅茂草引庚辛玉冊之通泉草爲註乃因通泉草亦有長生草之名而誤合也殊不知通泉草乃蒲公英之別名似此舛芴不勝指數至於貝母不分川象大棗不分南北以致功用相歧傳誤匪淺則悉爲補正其缺

一人部綱目收載不少如爪甲代刀天靈殺鬼言之
詳矣茲求其遺必於隱怪殘賊中搜羅之非云濟
世實以啟奸夫殺物救人尚干天怒況用人以療
人乎故有謂童腦可以生勢交骨可以迷魂直羅
刹脩羅道耳噫孫思邈且自誤矣老神仙吾何取
哉今特刪之而附其所刪之意於此

一 是錄選輯之初於目下分註增品補治二字爲別
凡綱目未載則爲增綱目已載治法未備則爲補
庚子春復加校訂於補治十去八九蓋常用者主

治自紛綱目采載亦夥毋庸再補惟綱目所收罕
用之物而主治寥寥仍爲補治不刪品類無多亦
不必目下分識故概削之

一綱目中大目爲綱細目爲目有釋名集解以考名
稱形狀氣味主治以別寒熱功用發明以著其效
正誤以定其訛脩治以和其性且主治未備則有
附方物質相同則有附錄亦可謂詳盡矣然其例
亦有不一者若土當歸乃荷包牡丹之根而無釋
名集解鐵線草金絲草有集解而不言形狀水仙

花甘鍋泥非難得之物而氣味不載既列脩治而
諸石中獨罕見其法既無主治則不應入藥而海
獺猾髓並錄不遺尋常之味每多發明珍貴之倫
未獲一解可見前人用心多持矜慎予成書既簡
一切繁例從芟其藥品采自陳編在古人原載氣
味形狀或一物數名者統爲直敘不另分細目有
得之傳聞或舊本不載名解氣味者亦不妄添臆
說閒有一得則爲附註於後以就正方家倘蒙同
志之助爲一一指訂舛訛更當永誌不朽

本草綱目拾遺水部目錄

春水

天孫水

荷葉上露

糯稻露

白雲

鹵水

竹精

古刺水

強水

刀創水

鼻沖水

丹砂水

會青水

白鳳漿

天蘿水

黃茄水

梅子水

櫻桃水

各種藥露

御溝金水

起蛟水

混堂水

雞神水

日精油

本草綱目拾遺卷一

錢唐趙學敏恕軒氏輯

合肥張紹棠又堂氏刊

水部類 凡二十四種

春水

南詔志春水有三俱在鶴慶府一在城東南二十里石碑坪一在城南三十里龍珠山麓一在城東北三十里五老山下春水盈時有硫黃氣郡人於二三月閒和鹽梅椒末飲之能祛疾 職方考雲

本草綱目拾遺 卷一
南鶴慶府出春水在觀音山蓮花寨之北立夏前三日出後七日止水無定所每出時地中漉漉有聲土人循其聲掘之其水始出能除百病遠近村民競飲之走彝方者飲之不染瘴病癘者飲之立除外境人尤效數日內有鸚鵡綠鳩數百羣飛來飲水涸乃去

味甘性平除痼疾厚腸胃已虛勞去瘴癘

敏按土爲萬物之母凡物得土之精者均入脾胃草聽扶正氣正氣足則百病自除此水在地能鳴

出無定所乃川脈得先天之氣藉地力宣洩故有
厚胃除疾之功出七日卽涸并具來復之機鶴慶
爲雲南邊境山川蒙密民多瘴癘府志載城東南
尚有溫泉每歲三月郡人浴之有痞疾者輒愈則
又不特春水之出其地也天心愛人生一害必生
一物以救之如出鳩之地多犀觀於此水可以悟
物理矣

天孫水

廣志云卽七夕水廣人每以七夕雞初鳴汲江水

或井水貯之是夕水重於他夕數勛經年味不變
益甘甚以療熱病謂之聖水若雞二唱則水不然
矣

色清性微寒味甘治一切熱症神效

喉蛾喉癰 陸氏濟世良方用肥婆草搥爛將些

聖水開服如牙痠牙癰將此草搥爛和聖水含在
口內吐換數次卽愈

治食百尿 濟世良方用苦瓜搥爛取汁和聖水
服之卽愈若無苦瓜取其核搥爛和聖水服之

荷葉上露

夏日黎明日將出時將長杓坐盃於首向荷池葉上傾瀉之以伏露爲佳秋露太寒花上者性散有小毒勿用

味甘明目下水臑氣脹利胸膈寬中解暑大力丸

用之

蓮葉象震卦荷上露或亦入肝而滋益肝臟歟

按露本陰液夜則地氣上升降而爲露其性隨物而變居易錄有碧玉露漿方於中秋前後用無五倍子新青布一二匹扯作十餘段每一段四五尺

五更時於百草頭上或荷葉稻苗上者尤佳先用
細竹一根掠去草上蛛網乃用青布繫長竹上如
旗樣展取草露水絞在桶中展溼卽絞視青布色
淡則另換新布陽光一見則不展所取露水用甕
罐洗淨盛貯澄數日自清晚開用男乳一酒杯約
一兩半白蜂蜜一酒杯人參湯一酒杯多少同乳
人參須上等四五分不拘總入一宮盃內將露水
一飯盃攪入宮盃共得七八分和勻以棉紙封
用碟蓋好次日五更燒開水二大盃將宮盃內露

隔湯頓熱睡醒時緩緩溫服之藍所以殺蟲露去
諸經之火參補氣乳補血蜜潤肺治一切虛損勞
症有奇效可知露本養陰扶陽又得荷葉之清氣
故能奏功如此

糯稻露

俞佳士妙應方治痞塊八月白露後收糯稻頭上
露水晚作二服飲下立消

按諸草木皆需天露始潤惟稻至酉時其根上津
潤之氣漸升入夜乃達葉尖至曉復自土而降於

本草綱目拾遺卷一
根故無露之夜稻葉獨潤陳翠虛詞一些珠露阿
誰運上稻花頭是也

白雲

雲本山澤之氣蒸而爲雲水屬也故入水部雲有
五色惟白雲可治病唐守時言凡高山大川悉有
雲氣五嶽名山多出雲山僧取之餉客其取雲法
用金漆盒蓋上鑿一孔以木塞之俟天氣晴朗黎
明往山巖石畔覓之見地上有白雲如線者如筍
者苗土而出卽雲苗也急以盒蓋孔對其氣使盡

入其中以木塞口收必須白雲如雪色有香氣如
海蘭方合用其他雜色雲多帶草土氣黑雲尤腥
多帶怪物不宜盒取放雲之法擇淨室須四面有
窗者通上下用紙裱糊勿令洩氣然後將雲盒置
中去塞則雲自出悠揚渙散芬芳四繞可以醒脾
胃舒肝鬱而和經絡令人有翛然出塵之想

治啞瘴余澹菴云滇廣山瘴有一種人受之終身
不能語名曰啞瘴唯聞白雲之氣久久自引毒外
出可以全愈

血臟水腫聞雲氣漸消

鹵水

苦鹹無毒治大熱消渴去煩除邪下蠱毒柔肌膚
去溼熱消痰磨積塊垢膩多服損人

食纂

綱目有鹽膽水乃已燒成鹽復漚下之苦鹵一名
鹵水此乃取於鹵地漚以燒鹽之用與鹽膽水不
同

竹精

汪東藩醫奧云毛竹內剖之新竹多有水乃竹精

也以不臭色清者入藥佳

治汗斑以雞毛蘸水刷上立退

五月五日雨剖竹得水名神水

古刺水

帶經堂詩話左公蘿石手書一帖云乙酉年五月

客燕之太醫院從人有自市中買得古刺水者上

鐫永樂十八年熬造古刺水一罐淨重八兩罐重

三斤內府物也按左詩中有再拜嘗此水含之不

忍咽句則此水未嘗不可服食也又云瓶中古刺

本草綱目拾遺卷一
水製自文皇年製之局天府元石流清泉列皇飲
祖澤旨之如羹然繹詩意又似常服所製亦不止
十八瓶也王阮亭居易錄有客自燕至出其橐有
阿房宮磚瓦一陸探微畫一古刺水十餘罐古刺
水用錫罐貯之上朱刻永樂二年熬造罐重二斤
水八兩香氣酷烈據此則古刺水又如是之多罐
面以錫刻字塗朱其曰二年則又在前或明時內
府有此製耳 何氏辟寒錄云古粹本賓橫閭墟
名以墟中之泉釀酒埋之地中日足取出名古粹

泉色淺紅味甘不易敗此或另一種也按輿地志
賓橫在廣西南甯界 陳墨樵茗水札記云姚履
中坦爲予言餘杭一舊家祖遺一錫瓶製極精緻
面刻三楷字云古刺水口封固極密搖之有水聲
相傳數世亦不知何用薛澱山洪云嚴嵩抄家籍
上有此其涼沁骨蓋暑月以涼體者 李觀王日
記云予館河東裴氏其家有古刺水一罐係銅製
高四寸圍一拱身圓面平狀如花鼓銅質青黃四
圍牢鑄詠樂二十一年十月鑄古刺水一罐罐重

三斤水重八兩共二十二字字皆陰文據云世宦
鄭氏舊物也鑽銅取水可療瞽疾 朱退谷曾於

陝西陳渭野處見古刺水一瓶云是海壇鎮張傑
家物其製上大而下小圓如瓶式四圍無痕跡搖
之有水聲面微有小鑽孔言曾有富瞽持千金欲
售之以治目方取鑽鑽孔天大霹靂因懼而止然
此物亦神矣 孫雍建云古刺地名古刺水乃三
寶太監所求得之物天下止有十八瓶其瓶以五
金重重包裹其近水一層乃真金也水色如醬油

而清光可鑑以火燃之如燒酒有燄者眞其性大熱乃房中藥也婦人飲之香沁骨肉

性涼澤肌膚明目療青盲開瞽功同空青治熱症有效以茶匙滴汁入湯浴能令香氣透骨不散

按古刺水據薛氏言性涼可治熱疾孫氏言性大熱止可入湯沐不可服今是物世雖有之但市充貢品價值千金不聞有服試之者故並附孫說以俟考 又葉東表言古刺水手蘸少許嚙入鼻中能驟長精神強骨力其香氣蓋能和血通竅昔未

有鴉片烟以前惟用此後因呂宋有鴉片而人遂不知用古刺水緣水貴而鴉片賤故人爭用賤者其實功效相倣房中術嗜法更勝於服

強水

西洋人所造性最猛烈能蝕五金王怡堂先生云其水至強五金八石皆能穿漏惟玻璃可盛西人造強水之法藥止七味入罐中熬煉如今之取露法旁合以玻璃瓶而封其隙下以文武火疊次交煉見有黑氣入玻璃瓶中水亦隨氣滴入黑氣盡

藥乃成矣此水性猛烈不可服食西人凡畫洋畫
必須鏤板於銅上者先以筆畫銅或山水人物以
此水漬其閒一晝夜其漬處銅自爛勝於雕刻高
低隱顯無不各肖其妙銅上有不欲爛處先用黃
蠟護之然後再漬俟一週時看銅有爛痕則以水
洗去強水拭淨蠟迹其銅板上畫已成絕勝鏤鏤
且易而速云入藥取其氣用

治癰疽拔疔 謝天士云凡癰疽已潰或未潰用
強水可蝕惡肉勝於硃砂只須置強水於玻璃瓶

內以瓶口對癰疽上斂少時其藥氣自昇入患處
疽肉變白而腐毒亦拔出然後再敷他藥治之疔
有根亦以此治法則根自爛出

物理小識有礮水翦銀塊投之則旋而爲水傾之
盂中隨形而定復取礮水歸瓶其取礮水法以琉
璃窰燒一長管以煉砂取其氣道朱公爲余言之
崇禎庚辰進坤輿格致一書言采礦分五金事工
省而利多壬午倪公鴻寶爲大司農亦議之而政
府不從今日番礮甚少但有氣礮眞番礮乃能乾

汞按此礮水卽強水也特古今異名耳

刀創水

出西洋不知何物合成番船帶來粵澳門市之
治金創以此水塗傷口卽斂合如故

鼻沖水

出西洋船上帶來不知其製或云樹脂或云草汁
合地洩露曬而成者番船貯以玻璃瓶緊塞其口
勿使泄氣則藥力不減氣甚辛烈觸人腦非有病
不可嗅島夷遇頭風傷寒等症不服藥惟以此水

瓶口對鼻吸其氣卽遍身麻顛出汗而愈虛弱者
忌之宜外用勿服治外感風寒等症嗅之大能發
汗

丹砂水

曜仙神隱有造丹砂水法丹砂一斤石膽二兩消
石四兩以小口磁罐漆固其口埋地中四十九日
出視成水則藥成矣若未化再埋又法用竹筒盛
亦可

味苦服之延年殺精魅卻惡鬼養精神安魂魄

會青水

神隱云製同丹砂不用石膽易以汞二兩藥用洗
眼亦可服

止目痛收風淚久服輕身不老

白鳳漿

痘學眞傳有造白鳳仙漿法用單葉白鳳仙花采
閉罈中令滿以箬封口再將泥塘之埋土內二三
十年方取用罈中花悉化成水割去滓腳其清水
卽鳳漿也另貯磁瓶聽用

本草綱目 卷一 天蘿水
性大寒治痘疹焦陷不救者藥內加一茶匙服之
立能回焦更生痘不可多用疎痰解一切火毒大
有奇功

天蘿水

救生苦海霜降後擇粗大絲瓜藤掘起根三四寸
翦斷插瓶中一夜其根中汁滴入瓶內名曰天蘿
水封固埋土中年久愈佳

治雙單蛾飲一杯卽愈又可消痰火化痰成水解毒
如神兼清內熱治肺癰肺痿更效

蕭山有一老嫗家市肺癰藥水三服立愈門如市
已數世矣王聖俞曾得其方述之卽此水也於立
秋日取存瓮用愈陳愈佳

黃茄水

梁侯瀛集驗方秋天黃老茄子不計多少以新瓶
盛埋土中一年化爲水取出聽用

治大風熱痰能消痰成水用茄水和苦參末爲丸
桐子大食後及臥時黃酒送下三十丸甚效

梅子水

秋泉祕錄有造梅子水法用大梅子三五十個搗碎入有嘴瓶內加鹽三兩入河水浸過二指日取蜒蚰投入多多益善經年更佳凡毒將水搽之卽消

治諸毒惡瘡

櫻桃水

梁侯瀛集驗良方春日鮮櫻桃收數斤盛在磁瓶內封口放在涼處發過成水濾出渣聽用

治凍瘡瘡神驗將水搽在瘡上卽愈若預搽面則

不生凍瘡

疹發不出

名曰悶疹

用櫻桃水一杯略溫灌下垂

死者皆生

不藥良方

各種藥露

凡物之有質者皆可取露露乃物質之精華其法始於大西洋傳入中國大則用甌小則用壺皆可蒸取其露卽所蒸物之氣水物雖有五色不齊其所取之露無不白祇以氣別不能以色別也時醫多有藥露者取其清冽之氣可以疏瀹靈府不

似湯劑之膩滯腸膈也名品甚多今列其常爲日用知其主治者數則於左餘俟續考以補其全

金銀露 乃忍冬藤花蒸取鮮花蒸者香乾花者少遜氣芬郁而味甘能開胃寬中解毒消火暑月以之代茶飼小兒無瘡毒尤能散暑 金燦然藥帖云金銀露專治胎毒及諸瘡痘毒熱毒 廣和帖云清火解毒又能稀痘

薄荷露 鮮薄荷蒸取氣烈而味辛能涼膈發汗虛人不宜多服 金氏藥帖清涼解熱發散風寒

玫瑰露 玫瑰花蒸取氣香而味淡能和血平肝
養胃寬胸散鬱點酒服 金氏藥帖專治肝氣胃
氣立效

佛手露 佛手柑蒸取氣香味淡能疎膈氣 金
氏藥帖專治氣膈解鬱大能寬胸

香櫞露 香櫞蒸取氣香味淡消痰逐滯與金橘
橙露同功

桂花露 桂花蒸取氣香味微苦明目疎肝止口
臭 金氏藥帖專治齟脹牙痛口燥咽乾 廣和

帖止牙痛而清氣

茉莉露 茉莉花蒸取氣香味淡其氣上能透頂
下至小腹解胸中一切陳腐之氣然止可點茶不
宜久服令人腦漏

薔薇露 出大食占城瓜哇回回等國番名阿刺
吉灑衣經歲其香不歇能療心疾以琉璃瓶盛之
翻搖數回泡周上下者真功同醑醑露皆可以澤
肌潤體去髮臄膩散胸膈鬱氣 又一種內地薔
薇露係中土薔薇花所蒸專治溫中達表解散風

邪

蘭花露

此乃建蘭花所蒸取者氣薄味淡食之

明目舒鬱

雞露

道聽集云雞露能大補元氣與人參同功

男用雌雞女用雄雞一年內者名童子雞可用若
兩年者肉老質枯不可蒸露入藥須選童子雞以
繩縊死竹刀破腹醕酒洗去毛及腹中穢物勿見
水蒸取露飲之氣清色白望之如有油氣味甘消
痰益血助脾長力生津明目爲五損虛勞神藥

米露 以新鮮白米勿用陳久者蒸取色白氣清
如蓮花者大補脾胃虧損生肺金如神一云米露
用稻花蒸者更佳 廣和帖鮮稻露和中納食清
肺開胃

薑露 辟寒解中霜霧毒驅瘴消食化痰

椒露 鮮椒蒸取能明目開胃運食健脾

丁香露 氣烈味微辛治寒澀胃痛

梅露 鮮綠萼初放花采取蒸露能解先天胎毒
六月未出痘小兒和金銀露食之極佳 周櫟園

閩小記海澄人蒸梅及薔薇露取如燒酒法酒一
壺滴少許便芳香

骨皮露 地骨皮所蒸解肌熱骨蒸 金帖 一切虛

火 許帖

藿香露 清暑正氣

白荷花露 治喘嗽不已痰中有血 金帖 止血消

瘀清暑安胎 廣和帖

桑葉露 治目疾紅筋去風清熱 金帖

夏枯草露 治癩癧鼠瘦目痛羞明 金帖

本草綱目拾遺
卷一
枇杷葉露

清肺甯嗽潤燥解渴

金帖

和胃

許帖

甘菊花露

清心明目去頭風眩暈

廣和帖

御溝金水

集效方有製御溝金水法用篋籬八隻高二尺取

山上淨土裝入籬內用磁鉢八個盛之取童便八

桶傾入七籬土內淋下上以井花水推之共傾在

一籬土內如淋少再用清推前七籬淋下又加上

一籬內待他一夜淨淋下水三五盃以磁罐收貯

外用井水養之但遇此症待口中要茶吃將此水

半杯溫服卽安至重不過三七次立愈

性平味微鹹帶甘治男婦骨蒸乾血勞童子勞晝
夜發熱至緊不肯服藥此水不比尋常大有功效
起蛟水

徽州張宇南言其地多山每春夏之交久雨有起
蛟之患村人習見勿異也蛟初起一二日間地中
先有聲隱隱如雷鳴或如牛吼至期土中輒陷出
一小穴如豆大水從穴出直上一二尺如箭已而
漸升漸長長至簷隙與溜合則水勢乃大下穴亦

漸大如盃孔蛟如鰈鱗形從穴出乘水而上過簷則形變大乃飛越奔騰而去屋宇亦無害惟相隔一二里許田禾閒有傷損者爲山水沖刷而然此水初起一二尺時山人以瓶盞之屬接取食之力大無窮蓋出蛟口中含吮精力貫注直逼而上其全身之力盡在此水故人亦不能多食壯健者三蓋卽腹脹不能再飲土人以釀酒更壯精力可已虛勞

單杜可云蛟初起時水如箭清如泉脈漸湧而高

必合天雨水則勢大而能飛騰蛟出穴口始泛出水名曰發洪若初起時用河水一杓灌入其穴則蛟水自回便不能出穴或取婦人月經穢布塞之亦止若人服蛟水作脹用千里長流河水煎服之亦可解也

壯筋骨健腰膝已虛勞除驚悸殺蟲蠱尸疰鬼疰遁尸邪氣浴瘡疥虛弱者以代水煎滋補藥良性升能直透巔頂

混堂水

混堂今浴池燒水浴者人多則穢濁積垢使然人
氣薰漬體虛者觸之昏暈名曰暈堂毛達可曰凡
少年思慾不遂或赤白濁者待欲溺時入混堂坐
水中令出溺卽愈蓋得人氣通洽也

洗疥癬通淋濁

蛇鱗纏身 劉羽儀驗方飲浴湯水便可解毒

發痘 杭士元方痘出八九日黑陷用混堂水煎
藥立起

雞神水

太元玉格新書有造雞神水法眼科要覽選其方製法擇大蘿蔔一個開一大孔須近莖邊一頭開勿傷其根方可活孔內入雞蛋一枚仍種地上俟其發葉長成取雞蛋內水點眼其明如童

明目去障

日精油

泰西所製本草補云其藥料多非中上所有旅人九萬里攜至中邦決非尋常淺效勿輕視焉可也治一切刀鎗木石及馬踢犬咬等傷止痛斂口大

有奇效用法先視傷口大小若何其長闊而皮綻
先以酒洗拭淨隨用線縫大約一寸三縫合不可
太密傷口小者無用縫矣既縫以酒又洗拭淨將
潔淨瓷器盛油烘熱以男人所穿舊綿布取經緯
長短以傷口爲度逐縷蘸油貼滿瘡口又以男人
所穿舊布包裹忌用女人所穿者至三四日後解
開潤油少許如前包固數日卽愈如傷久血乾略
爪破或刀刮俾令血水以通藥氣如前包固但血
多則至流藥故無血不可多血亦不可也傷處忌

水與口涎最宜防之若傷已含膿及骨折者此油無益不必用矣如心腹耳鼻手足及各處骨節疼痛果屬風寒非關燥熱則此油可治問的痛之所以油揉擦極熱爲度然後以男人所穿者布包裹當用藥須坐密室切勿見風并忌食寒冷等物

草補

本草綱目拾遺卷一終

合肥范錫堯靜存
上元朱銘華藻臣校字

本草綱目拾遺火部目錄

陽火陰火

太陽火

星精飛火

鑛木火

擊石雷

火

石油火

水中

三昧火

黃金火

煤火

藤火匏火

荷榿火

稻麥穗火

松柴火

櫟柴火

茅柴火

燒酒火

魚膏火

蝟油火

丹藥火

蓬萊火

神燈火

火罐氣

烟草火

面烟

衡烟

潮烟

烟桿

烟筒中水烟

鼻烟

濟甯烟

烟梗

烟葉

水烟

鴉片烟

藏香

本草綱目拾遺卷二

錢唐趙學敏恕軒氏輯

合肥張紹棠又堂氏刊

火部

陽火陰火

火有陰陽乃太極之妙蘊人盡以火爲純陽不知有陰火惟聖人知之故離卦中虛陽中有陰也坎卦中實陰中有陽也火地生物亦然陽火無質以物爲質然後寄其形以燃物陰火有質不必寄形

於物而不能盡焚諸物蓋陽火乃火之魂屬陽氣
熱陰火乃火之魄屬陰氣不熱瀕湖統十二火以
分陰陽其曰天之陽火二太陽火星精飛火地之
陽火三鑽木火擊石火夏金火人之陽火一丙丁
君火夫太陽灸背卽暖星精火有光有聲其墜地
之初如燔石手不可近鑽木之火鑽與木皆燠熱
有烟擊石夏金必兩物摩盪熱則火出皆有火氣
人身君火所呵出之氣天雖極寒而人氣無不熱
此皆陽火爲火之魂氣雖熱必寄形於物乃燃故

水晶取日中之火承艾而烟起火殃爲飛星之精
入土乃起焚房屋鑽木擊石戛金非物受其火不
能存也人身丙丁火能解犀角散積陰之氣已不
啻寄其身而焚之也其氣皆猛烈可知其曰天之
陰火二龍火雷火地之陰火二石油火水中火人
身之陰火二命門相火三昧眞火龍火不能焚物
止能焚砂石蓋龍本純陽而火反陰者以陽爲體
以陰爲用也雷火不能焚物能焚金鐵蓋雷之擊
物必有聲其用屬陽而其體屬陰也砂石本土之

餘氣爲先天火結以陽體焚之金鐵爲水之母本陰精而卽以陰體鎔之此五行生尅之妙也石油能於水中生火凡水中一切物非石油不能焚之水申火本鹹精故海水入夜則明至陰之氣不能焚物也命門相火卽人身慾火與三昧眞火皆能自焚不能焚物此皆陰火爲火之魄氣不熱不必寄形於物而有能焚不能焚之別非若陽火之遇物無不消鎔也瀕湖僅列其名又不晰言其故且其主治功用又皆晦之故特爲詳述以補

太陽火

除溼止寒澀舒經絡

痼冷以體曝之則血和而病去冬月以舊帛曬受陽氣覆

體皆能卻疾

補脾養胃

作醬日曬受日氣多

久服長生

養生家有服日光法

星精飛火

辟伏尸

陳子靜養生註云火殃卽流星之精入土中其地有伏尸皆遠去

增志慮

聰明

談道錄有製星精米法以白米露星月下百

邪除癘

鑽木火

除瘟疫卻四時不正之氣周禮司燿掌火政四時
變火以救時疾卽此 殺精魅凡一切山魃木怪
年老精魅用千年古柏不得以凡火燃須鑽木按
時取火燃之

沈雲將食纂榆柳火助養生之氣利肝膽調筋脈
棗杏火消蕃茂之氣養心血通神明柞榴火斂耗
散秉元清利肺而滋本源制陽而結髓槐檀火補
腎藏益陰血使遍體調和周身通暢桑柘火補脾
胃壯真元

擊石火

宜鍼灸百病取其含陰氣於陽中有太極之妙張石頑以石取火爲陰火云不宜以之灼艾以太陽取於陽燧者爲陽火宜灸病不知石雖陰質非眞火蘊結則不成形凡石中皆有火火石較他石尤火多而易取者以此石獨受太陽之氣厚也石陰而火陽必受擊乃出火多者且有炆炸聲若陰火則無聲矣故灑湖列爲地之陽火石頑以爲陰火未免拘墟之見耳

夏金火

能散鬼燐野祟夏金取火照之卽滅跡

人身君火

卽人元氣能救卒死魘死以口布氣度之卽生散
鬼氣呵氣吹之卽滅○發痘凡陰寒不起不漿者
用壯健人氣呵之卽起發紅活漿行而毒化○止
腹痛腹瀉老年人多有氣弱受寒患此者用壯年
人以手搓極熱頻互掩其臍使手中熱氣透入丹
田自愈此借君火之力也

龍火

龍起石中石內必有焦裂處乃龍口火所燒也刮其石末煎湯治痞膈如神以石受龍火之氣無堅不破也

海上格物論

雷火

其震木有硫黃氣者得雷火之氣也能治驚癇邪祟合辟瘟丹加用最妙

石油火

有毒不宜燻物以紙撚蘸油點火照瘡可引毒外

出

水中火

著體能漬肉腐爛可摩風氣

相火 三昧火

凡人皆不能運用惟有道之士能運以療病起死
回生相火能結舍利成堅固子三昧火能殺精魅
黃金火

以金器燒紅烙肉上能止血凡人神所在誤鍼出
血不止者燒金器烙之

選元方

煤火

本經逢原云北方炊食多用煤火以地屬坎足勝其氣且助命門真火食煤火長氣於陰所以膂力強壯南人食之多發癰毒受其毒者以齋汁解之然煤火處置大缸水於旁則毒從水解南方炊食多用薪火人食薪火長氣於陽氣多輕浮不實不似北方之稟氣剛勁也然近日南方亦產煤薪價目昂市井多有用煤者其煤在浙省則出於衢嚴湖州較北煤堅細以之代薪煤氣亦減薄甚有如

薪炭無臭氣者名曰香煤出太湖山中綱目石部
收烏金石卽煤也其主治多言其質之用而火部
又不收煤火故爲補之用以香煤爲佳
烹一切食物能和脾胃滋氣力通腎氣助陽道婦
人煖子宮雜煤臭煤有毒

藤火匏火

藤乃木本各種山藤性最蔓延喜束物故爲火亦
如其本性匏屬皆瓠類草本也蔓皆中空而長養
最速其性行甚捷今徽人作花炮者其藥線必用

壺盧炭取其疾速勝於杉柳梢同一藤也而草木之性不同如此

藤火 宜煎臑脹水腫四肢諸病等藥

匏火 宜煎救急諸藥取其頃刻能達經絡也

荷梗火

荷梗入秋人多采取積之使乾爲薪入鑊煮肉則精者反浮肥者反沈入藥用其火氣能通肝肺二竅

宜煎一切轉脬交腸藥能正倒陰陽之氣

稻麥穗火

稻穗火烹煮飲食安人神魂利五臟六腑糯稻穗

尤峻烈

盧鎧日記烏鎗用糯穀炭取其鎔鐵力
速見風鉛子不凝其能久住之力如此

穗火煮飲食主消渴咽乾利小便

松柴火

煮飯益人壯筋骨煎茶不佳 食纂 松卵火煎茶美

以能聚茶力使不散真味

櫟柴火

櫟柴煮豬肉食之不發風煮雞鵝鴨魚腥等物易

爛且良

茅柴火

炊煮飲主明目解毒

食纂

燒酒火

酒本米麴之精華屬陽燒酒則又爲酒之精華乃陽中之陽燃之色綠陽極陰生之象與石硫性同皆以陽爲體藏陰於用也故其光照人面皆作青灰色照魑魅則不能遁形以陰爲用者多含毒今人率以此酒冬月爲大盃用以煖物代炭火久食

則發癰毒默受其毒而不覺然維藏寒者宜之氣
能透達骨髓軟堅燥溼熏衣著之能發骨髓中汗
魚膏火

海上人多取魚膏爲油代菜菔油用其油割海魷
腹中脂或取其肉並煉爲膏燃之照夜然烟重氣
腥多昏目損神秦始皇墓中以鯢膏爲燈卽此後
人多解爲人魚者誤也

辟蚊蛾熏竹木除蠹

蝟油火

乃刺蝟脂肉所熬油山左蝟大者如貓山人獲取之熬其脂肉可得油斗許用以照夜光明皎澈同白晝比蠟猶明此油可入神燈照用按蝟脂可炸鐵骨能縮人筋骨其性峻利可知入神燈其氣照毒能籬毒使小

丹藥火

錦囊秘授有製救苦丹法真麝香一錢劈砂水飛二錢好硫黃三錢各研極細先將硫黃化開次入麝砂二味離火攪勻在光石上攤作薄片切如米

麩糶二樣小塊貯瓶勿洩氣治病將藥安患處以
燈火點著候至火滅連灰罨在肉上立見痊愈重
者用米粒大輕者用糶粒大安放銅錢眼內香火
燃之只須一炷不必復灸如若患處闊大連排數
炷一起灸之且灸時不甚熱亦不甚疼灸後並不
潰膿一茶之頃痼疾如失係觀音佛所授真神方
也又海上仙方亦有救苦丹其法用麝五分硃砂
水飛錢半硫黃五錢樟腦錢半俱爲細末入銅器
內文武火烘燥取起冷定敲碎如米粒大用能治

各種風痺跌撲癰疽初起有效 敏按此丹藥諸
火爲人工製造本非天生藥料然本草中又不得
不載造釀一類卽瀕湖火部收載神鍼之意也因
與神燈火並錄以補李氏所未述

治一切風寒溼氣流注作痛手足蹇攣小兒偏搐
口眼喎斜婦人心腹痞塊攻疼無分年深月久皆
可用

蓬萊火

茅昆來家傳醫要有蓬萊火法西黃雄黃乳香沒

藥丁香麝香火消各等分去西黃加礪砂草烏皆
可用紫棉紙裹藥末撚作條如官香粗以緊實爲
要治病翦二三分長一段以糝黏黏肉上點著不
過三次卽除根若點穴不差灸至藥盡皮肉發爆
病卽立愈每次三壯重者不過三次卽除根不復
再發灸後忌豬肉待瘡平復再食此茅氏家傳五
世試效神驗方也

治風痺跌撲癰癤

俱按患處灸

水脹膈氣胃氣

按穴灸

陽燧錠

趙氏集要古有烙法今罕用之不但粗工不知用法抑且患者見之駭然故以此代之法用乾蟾酥剉薄片焙研硃砂水飛川烏草烏各五分殭蠶一條各研細將硫黃一兩五錢置杓內微火鎔化入藥末攪勻急攪爲要遲則凝矣傾入磁盆內速擎成片待冷收用用時取甜瓜子大一塊上尖下平先將棗肉擦患處黏藥於上香火點著卽起火焰五壯七壯九壯隨症施之灸畢卽飲米醋半酒杯候起小泡線鍼穿破出黃水些須膏藥蓋住其毒

卽消

此方遺寫冰片麝香二味原稿眉注

治溼痰流注附骨陰疽寒溼瘡毒經久不消內潰
不痛者能使未成卽消已成卽潰已潰卽斂如菽
風痺用竹箸點之有酸痛處筆蘸墨記之照墨上
灸若腿膝疼痛灸鬼眼穴諸瘡初起灸三五壯卽
瘥

神燈火

外科有神燈照法用硃砂雄黃俱研水飛血竭沒
藥箬烘去汗各二錢麝香四分爲極細末每用三

分以紅棉紙緊捲撚條約長七寸麻油潤透以火
燃著須令患者坐無風處將藥條離瘡半寸自外
至內週圍徐徐照入火頭向上藥氣乃入毒卽隨
火解散自不內侵臟腑不可太過恐傷好肉其瘡
微微覺熱心神卽爽每日只燻一次初用三條每
日加一條加至四五條勢卽漸減然後每日減去
一條直燻至紅腫消盡爲度燻後用後藥豨薟草
新鮮采得者搗爛入陳年小粉等分初起者再加
白鹽研細少許打成稠糊敷半寸厚留頭必須敷

過瘡暈三分方能箍定毒根瘡口之上用大蔥葉
滾水泡熱扯開貼之或膏蓋亦可避風爲妙自能
拔出膿毒如無鮮草以如意黃金散代之集要云
神燈照法勿用太早如瘡四五日間形未成毒未
聚驟用之毒必內鬱反難外出須用在八九日後
瘡勢已定毒氣已聚未成膿腐之時用此照之未
成者自消已成者自高不起發者卽發不腐潰者
卽潰若毒已潰膿已泄者不宜用每日以豬蹄湯
淋洗或蔥頭煎湯洗亦佳忌發物

治一切腫毒癰疽發背能解毒活血消腫散瘀

火罐氣

火罐江右及閩中皆有之係審戶燒售小如人大指腹大兩頭微狹使促口以受火氣凡患一切風寒皆用此罐以小紙燒見焰投入罐中即將罐合於患處或頭痛則合在太陽腦戶或巔頂腹痛合在臍上罐得火氣合於肉卽牢不可脫須待其自落患者但覺有一股煖氣從毛孔透入少頃火力盡則自落肉上起紅暈罐中有氣水出風寒盡出

不必服藥

治風寒頭痛及眩暈風痹腹痛等症

烟草火

沈雲將食物會纂烟以閩產者佳燕產者次石門產者爲下春時栽植夏時開花土人除一二本聽其開花收種外餘皆摘去頂穗不使開花并去葉間旁枝使之聚力於葉則葉厚味美秋日取葉用竹簾夾縛曝乾去葉上粗筋用火酒噴製切葉細如髮每十六兩爲一封貿易天下其名不一有真

建假建之分蓋露頭黃二黃之別近日北方製烟不切成絲將原曬烟片揉成一塊如普洱茶磚茶一般用時揉碎作末入烟袋中貯用 頂上數葉

名曰蓋露味最美此後之葉遞下味遞減相傳海外有鬼國彼俗人病將死卽昇置深山中昔有國王女病革棄去之昏憤中間芬馥之氣見臥傍有草乃就而嗅之便覺遍體清涼霍然而起奔入宮中人以爲異因得是草故一名返魂烟○方氏物理小識烟草明萬厯末年有攜至漳泉者馬氏造

之曰淡肉果漸傳至九邊皆含長管而火點吞之
有醉仆者崇禎時嚴禁之不止其本似春不老而
葉大於菜暴乾以火酒炒之曰金絲烟可以祛溼

發散久服則肺焦諸藥多不效其症令人忽吐黃
水而死○粵志粵中有仁草一曰八角草一曰金

絲烟治驗亦多其性辛散食其氣令人醉一曰烟

酒其種得之大西洋一名淡巴菰相思草

物理小
識淡巴

姑或呼
擔不歸

閩產者佳近出江西射洪永豐者亦佳製

成烟有生熟二種熟者性烈損人尤甚凡患咳嗽

喉癰一切諸毒肺病皆忌之近蘭州出一種烟名

曰水烟以水注筒吸之令烟從水過云絕火毒然

烟味亦減○張良字云水烟出蘭州五泉地種者

佳食其氣能解瘴消臑寬中化積去寒癖但不宜

多食其製法以砒夾香油炒成故不能無毒也近

日粵中潮州出一種潮烟其性更烈○姚旅露書

云呂宋國有草名淡巴菰一名金絲醺烟氣從管

中入喉能令人醉亦辟瘴氣搗汁可毒頭蝨○延

綏鎮志烟草其苗挺生如葵葉光澤形如紅蓼不

相對高數尺三伏中開花色黃八月採陰乾用酒洗切成絲而各省之有名者崇德烟黃縣烟曲沃烟美原烟惟日本之倭絲爲佳○百草鏡菸一名相思草葉如菘菜厚狹而尖秋月起莖高者六尺花如小瓶淡紅色產福建者良用葉以伏月採者佳生頂上者嫩而有力色嫩黃名蓋露烟烟品之多至今極盛在內地則福建漳州有石馬烟色黑又名黑老虎係油炒而成性最猛烈多食則令人吐黃水浙常山有面烟性疎利消痰如神凡老人

五更咳嗽吐痰者食之嗽漸止痰亦消江西有射
洪烟性清肅導氣湖廣有衡烟性平和活血殺蟲
可已虛勞山東有濟甯烟氣如蘭馨性亦剋利甘
肅蘭州有水烟可以醒酒近日粵東有潮烟出潮
州每服不過米粒大性最烈消食下氣如神然體
弱者忌○長洲張璐玉本經逢原云烟草之火方
書不錄惟朝鮮志見之始自閩人吸以祛瘴向後
北方藉以辟寒今則遍行寰宇豈知毒草之氣熏
灼臟腑遊行經絡能無壯火散氣之慮乎近日目

科內障丸中間有用之獲效者取其辛溫散冷積之翳也不可與冰片同吸以火濟火多發烟毒不可以藤點吸恐其有蛇虺之毒也吸烟之後慎不得飲火酒能引火氣燻灼臟腑也又久受烟毒而肺胃不清者以砂糖湯解之○蘭上徐沁堃著烟誠載有祛烟蟲方云杜湘民說凡人食烟則腹中生蟲狀類蠅兩翅鼓動卽思烟以沐之故終日食不暇給久之蟲日盛而臟腑敗疾疢大作不可救藥常有臨革喫烟而始瞑者哀哉其方用生豆腐

四兩截數孔黑砂糖二兩加腐上寘飯甑中蒸之使腐與糖融化每思烟輒進數匙只三日後其蟲盡下聞烟氣則嘔不欲食矣○汪東藩云近日有一種熟烟閩人能製其法以油炒烟片令黑名黑老虎又曰紫建云食之香薷甘一體而備三味中其毒者欲吐不得須食北棗一二枚解之凡烟種有山田之分山種者味厚田種者味薄多草氣○張景岳云烟草味辛氣溫性微熱升也陽也燒烟吸之能醉人用時惟吸一二口若多吸之令人醉

倒久而後甦甚者以冷水一口解之卽醒若見煩悶但用白糖解之卽安亦奇物也吸時須開喉長吸嚙下令其直達下焦其氣上行則能溫心肺下行則溫肝脾腎服後能使通身溫暖微汗元陽陡壯用以治表善逐一切陰邪寒毒山嵐瘴氣風溼邪閉腠理筋骨疼痛誠頃刻取效之神劑用以治裏善壯胃氣進飲食祛寒滯陰濁消臃脹宿食止嘔噦霍亂除積聚諸蟲解鬱結止疼痛行氣停血瘀舉下陷後墜通達三焦立刻見效此物自古未

聞近自我明萬厯時出於閩廣之間自後吳楚地
土皆種植之總不若閩中者色微黃質細名爲金
絲烟者力强氣勝爲優求其習服之始則向以征
滇之役師旅深入瘴地無不染病獨一營安然無
恙問其故則眾皆服烟由是徧傳今則西南一方
無分老幼朝夕不能閒矣予初得此物亦甚疑及
習服數次乃悉其功用之捷有如此者因著性於
此然此物性屬純陽善行善散惟陰滯者用之如
神若陽盛氣越而多躁多火及氣虛氣短而多汗

本草綱目拾遺 卷一
者皆不宜用或疑其能頃刻醉人性必有毒蓋其
陽氣強猛人不能勝故下咽卽醉既能散熱亦必
耗氣然烟氣易散而人氣隨復陽性留中旋亦生
氣此耗中有補所以人多喜服未見其損者以此

○敏按釋氏書言人乃山川火土之氣和合以生
故脾胃亦受火土之氣以養烟本火土之精人喜
喫烟者病重卽不食烟以脾胃不受火土之氣故
烟亦不受也火土之氣不特養陽亦兼能生陽所
以妖魍鬼魅多能喫烟以無質吸無質味之氣也

至乾鹿子閉土中多年亦思得烟吸以融和其體

開礦閉死穴中之人久不得出亦不死鑿礦者於山穴中遇之呼爲乾鹿子見常中丞安宦游筆記

則知烟力之能走百絡通堅邃可知矣凡烟氣吸出悠揚於外陰爲鬼吸人不見耳故食烟之人多面黃不盡耗肺而焦皮毛亦因精氣半爲鬼吸也友人張壽莊己酉與予同館臨安每晨起見其咳吐濃痰遍地年餘迄未愈以爲痰火老疾非藥石所能療一日忽不食烟如是一月晨亦不咳終日亦無痰唾精神頓健且飲食倍增啖飯如湯沃雪

食飽後少頃卽易飢予乃悟向之痰咳悉烟之害也耗肺損血世多陰受其禍而不覺因筆於此以告知醫者景岳所云特一偏之見惟辟瘴卻佳○秋燈叢話予堂叔疾延一醫至食畢茹烟烟房大如升容烟筋許盡吸入腹卽瞑目不語敬倚仰臥而氣息闐如眾太驚其僕曰無慮也頃且蘇俄唇動口翕烟自口中噴騰而出蒼然若雲霧數刻始息乃欠伸而起張目四顧曰快哉晚食復如之詢其僕曰家居朝夕餐烟二次俱以筋爲率否則病

象人聞其言懼而辭焉其酷嗜之量有如此者

辛溫 本草從新云治風寒溼痺滯氣停痰山嵐瘴霧其氣入口不循經絡頃刻而週一身令人通

體俱快然火氣燻灼耗血損年○藥性考菸草味

辛性溫開鬱燒吸解倦罨傷止血烟油有毒殺蟲

最捷諸蟲咬傷塗之病失○烟有毒中其毒者煎

胡黃連合茶服之○汪東藩醫奧云烟毒以黑砂

糖和井水服之○延綏鎮志云性熱味辛有毒主

寒溼胸膈痞滿益津止飢多食傷氣○格致鏡原

云損容○王桂舟云烟渣入目如以他物洗之愈
洗愈疼必盲後已須用亂髮或髮纓緩緩揉之卽
愈○文堂集驗云凡服至寶丹須停烟茶酒飯一
二時按至寶丹卽塘棲痧藥

腳氣 同壽錄腳氣痛不可忍以致口眼喎斜手
腳如搐不省人事昏迷如死用黃建烟二觔炒熱
以坐桶盛入內將腳解光放入烟中出汗少冷又
炒熱隔日三燻七次卽除根

金瘡止血 良朋彙集以烟末敷之

烟梗

陳良翰云烟葉生者有毒人食之卽中毒發病難治其莖更烈登萊人用以毒魚凡溪塘中大魚難捕者用此法毒之用烟莖乾溼俱可剉碎同青胡桃皮搗爛置水中一飯間大魚輒如醉浮水面小者皆死雖鰻鱺龜黿鰕蟹蚌蛤之屬一齊罄斃其毒之猛烈如此然以此造烟則梗之味淡迥不如葉之味厚

烟葉

治腦漏楊春涯驗方菸葉半觔曬乾研極細末調
花露四兩曬乾用玫瑰餅再研吹入○喫蘭花烟
成腦漏者以白養脊骨燒烟燻之數日愈蘭花乃
江西賈人帶來一種蘭子卽澤蘭子也氣香烈取
其子研拌入烟名曰蘭花烟人食之作蘭花香然
其氣竄上往往入頂傷腦易成腦漏○葉天士種
福堂方治風寒溼氣骨節疼痛痿痺不仁鶴膝風
歷節風偏頭漏肩等症有見睨膏中用新鮮烟葉
搗汁浸松香曬乾入藥亦取其氣味以透利筋絡

也

毒蛇咬傷○慈航活人書先避風擠去惡血用生
烟葉搗爛敷之無鮮葉用乾者研末敷卽烟油烟
灰皆可○不藥良方治毒蛇及毒蟲傷用魚腥草
皺面草烟葉草決明等分杵爛敷之

辟臭蟲 活人書用烟葉鋪牀代褥或燒熏之則
臭蟲盡絕

烟桿

年久色黑毛竹男子用者良

秋燈叢話新昌張姓茹竹烟管四十餘年色如漆而光可鑑珍同拱璧雖戚好不輕假也母病無藥餌資質錢二緡典主子患損病諸藥罔效或謂非多年竹烟管不可治遂取張物截之數寸煎湯服之愈後酬張以巨萬金○陳毅齋云烟桿雖受烟火熏漬之氣然非藉人氣津液漸漬之必不酥透其桿經男子食者光澤可鑑一經婦人口便色黯不鮮明且多直裂紋又最忌糞凡多年好桿持以上廁能令光澀若象牙桿便裂開走油不堪用物

性之相忌如此

殺蠱毒傳屍癆塗惡瘡劈取中心油透而酥者擣如糊塗瘡卽痂或攤油紙上貼治蟲膈

百草鏡毒蛇傷先取婦人舊油頭繩紮住腫處勿令腫上再取耳垢封之止痛隨用多年油黑竹烟筒桿紫色者亦可毛竹者佳一段約長三寸咀嚼嚙汁渣淡吐去并取桿中之油搽患處烟桿味粹服之反甜蛇毒亦隨解痛止自愈試效多人凡蛇咬有蛇齒留肉內者烟油塗之自出

婦人血崩 劉怡軒云凡血崩諸藥不效者用多年舊烟桿紫色油透者佳截一寸燒灰黃酒調服下喉卽止屢試屢效

烟筒中水

俗名烟油古今秘苑烟油染衣以瓜子水洗之卽去○同壽錄云烟油入目如小兒及好喫烟者誤犯之若將別湯洗愈洗愈疼必至瞎而後已須用亂頭髮或鬚纓緩緩揉之卽愈○解蛇毒塗惡瘡頑癬殺蠱

毒蛇咬 劉羽儀驗方取喫烟桿內脂膏塗在咬傷處用手指搓入肉中痛卽止最效

蜈蚣咬 劉氏驗方用烟筒內膏油塗在咬處或烟灰擦之立止痛

按烟油一名烟膏味辛微毒陳貢士毅齋云烟油乃五行之氣相合而生近日外丹家用以點藥金又可益金色術士隱其名呼爲太極膏又曰氣泥曰五行丹剔以燃燈代油則一切毒蟲皆不近入水蛟龍亦畏之入藥舊竹桿劈取者良凡梅條藤

條紫檀烏木老鸛草及純銅純銀桿中油皆不及
竹中者性良惟象牙桿中烟油可殺蠱毒聞有橄
欖木烟桿其中油可毒魚至烟膏亦各隨所食烟
質爲高下烟肆所市烟俱以烟葉噴油打成塊用
鐵鏢披作絲售之此爲純葉不雜爲上品更有打
塊時夾素馨葉雜以礬紅鏢成絲再加薑黃末以
和其色者其氣燥烈損人烟膏亦淡而薄不及上
品力厚也海鹽朱進士醒庵云烟油解蛇毒初不
甚信後見里人獲一赤練蛇長八九尺粗如臂口

吐毒烟一犬近之蛇噓以氣卽腹裂死一人戲以
舊竹烟桿去頭嘴以竹絲通出油刺入蛇口蛇嚙
之卽瞑目閉口身捲縮俄復伸長如是數次直如
繩而斃始知其解毒殺蟲之功信不虛謬諸城劉
仲旭少府云西北口外出一種毒蟲名曰蝥蟻狀
如中土蚩蠅人出遇之卽觸人面不論何處被其
觸者亦不甚痛頃覺眼眶四圍出細蛆攢食睛膏
痛不可忍彼土人治法惟取烟桿四五枝折取烟
油塗目內忍痛片時其蛆皆死然後再用溫水洗

去烟油卽愈○椿園聞見錄撻拉巴哈台卽準噶
爾故地夏多白蠅爲害觸人畜眼角輒遺蛆而去
非以膠黏之不出○按常中丞筆記云西北臺站
及伊犁等處出一種野蠅亂撲人面若被其觸者
眼角內卽出蛆蟲痛癢異常有因此成瞽者土人
多以烟油塗眼角治之然疾愈後目亦紅腫數日
不消總不若蒙古治法以魚膠一塊向眼角黏出
之又不損目較烟油爲佳

烟筒頭中煤

濟急良方治蜈蚣咬傷取烟筒頭內硬煤擦之立時止痛

鼻烟

廣大新書有造鼻烟法香白芷二分北細辛八分焙乾豬牙皂角二分焙乾研薄荷二分冰片三釐乾烟絲爲君乾絲一錢必配福烟六七分許右藥各爲細末酌量配合不必拘分兩以色如櫻色者佳○有內府造洋造廣造及土烟數種鴨綠者最佳玫瑰色者次之醬色者爲下陳久而枯者不堪

用出洋中者能追風發汗○香祖筆記近京師有
製鼻烟者可明目尤有辟疫之功以玻璃爲瓶貯
之象牙爲匙就鼻嗅之皆內府製造民間不及張
玉叔云近有廣東來者較內府造者尤勝有五色
以蘋果色爲上○澳門紀略西洋出鼻烟上品曰
飛烟稍次則鴨頭綠色厥味微酸謂之豆烟紅者
爲下○常中丞筆記鼻烟或冒風寒或受穢氣以
少許引之使嚏則邪穢疏散積懣亦解若刻不少
間反有致疾者烟有多品總以洋烟爲最取其滋

潤不烈所以爲佳

通關竅治驚風明目定頭痛辟疫尤驗

水烟

參看前烟草條下

沈君士云水烟眞者出蘭州五泉山食之性尤峻

削豁痰消食開膈降氣惟虛弱者忌服亦解蛇虺

毒予家有烟戚餽食品因天暮未暇食眞筐中經

宿爲蛇涎所漬次日食之舉家皆患嘔吐腹痛惟

一小僕免詢之則每食後輒服水烟也○蔡雲白

言蘭州五泉種水烟其葉與枇杷葉相似與烟葉

迥別

鴉片烟

臺海使槎錄鴉片烟用麻葛同鴉土切絲於銅鑊
內煮成鴉片拌烟另用竹筒實以櫻絲羣聚吸之
索值數倍於常烟專治此者名開鴉片館吸一二
次後刻不能離暖氣直注丹田可竟夜不寐土人
服此爲導淫具肢體萎縮臟腑潰出不殺身不止
官弁每爲嚴禁常有身被逮繫猶求緩須與再吸
一筒者鴉土出噶喇吧海東札記鴉片產外洋咬

啣吧呂宋諸國爲渡海禁物臺地無賴人多和烟
吸之謂可助精神徹宵不寐凡吸必邀集多人更
番作食鋪席於坑眾偃坐席上中燃一燈以吸百
餘口至數百口烟筒以竹爲管大約八九分中實
櫻絲頭髮兩頭用銀鑲首側開一孔如小指大以
黃泥掐成壺盧樣空其中以火煨之嵌入首間小
孔上置鴉片烟於葫蘆首烟止少許吸之一口立
盡格格有聲飲食頓令倍進須肥甘不爾腸胃不
安初服數月猶可中止迨服久偶輟則困憊欲死

卒至破家喪身凡吸者面黑肩聳兩眼淚流腸臄不收而死

主治胃脘痛神效

藏香

出西藏作團成餅者良如香炷者次之色紫黃色氣甚猛烈焚之香聞百步外者佳僞者名京香不入藥用○有出打箭爐者不及西藏出者第一有紅藏黃藏紫藏之分○蕭騰麟西藏見聞錄云藏香有紫黃二色粗細二種各處皆有惟產於巴塘

者爲最○朱大駿云親見藏香有黑如墨者燃之
催生甚妙○宓元良云藏香有紫黃二色紫者內
有瑣瑣蒲萄汁合成故色紫而性開關竅透發而
上升能發痘瘡黃者性下降可催生不可亂用○
聞人達遠云藏香有綠色者云最貴焚之嗅其烟
可清目不知彼中何草合成○葉明齋云藏香中
有一種白色小丸子焚之氣頗幽爽亦係番僧所
貢不知何名其香氣嗅之可治老人腸燥氣虛便
秘入廁時焚一二丸最妙亦可治痘○馬少雲衛

藏圖識藏香有紫黃二種眞者焚時烟凌霄漢蓋以珍寶屑成之又有黑白香白香亦名吉吉香黑香亦名唵叭香○敏按藏香祇有紫黃二色爲正品其所云紅綠黑白諸色皆屬他香近亦罕見姑存其說以備考○王景略曾爲織造寅公製藏香其方云得自拉藏予求其法附載於此速香二片沈香黃熟香黃檀香廣木香各四兩春花甘松三柰玫瑰瓣母丁香細辛檜皮生軍排草乳香金顏香唵叭欖油蘇合油伽楠水安息各二兩冰片一

兩右各爲極細末以頂好榆麩二筋火消十兩化
水加老醞酒調和爲香

殺邪治祟功同蒼朮痘瘡不發點牀角上令兒聞
之能透斑甚妙愈瘧催生明目

按痘乃先天胎毒非火不結因感而發最忌燥烈
以香氣熏觸不愈滋其枯裂乎透斑之說予終未
敢深信蓋凡香皆作燥熱者猶烈夫痘靨曰苗痘
發曰花旣曰花則性未有不喜潤者安得以香燥
助其毒卽能透斑終恐乾紅而歸黑陷耳

本草綱目拾遺土部目錄

楊妃粉

丹竈泥

洗手土

觀音粉

烏龍粉

白硃砂

鑄銅罐

白蠟塵

檀香泥

席下塵

回燕膏

鞋底泥

鼠穴泥

椅足泥

狗溺硝

雞腳膠

烏金磚

蛆鑽泥

土部

楊妃粉

產馬嵬坡上取之者必先祭然後掘之去浮土三
尺有土如粉膩滑光潔於女子最宜澤肌有效○
職方典出陝西西安府女面有黑黝以水和粉洗
之卽除

拭面去黝黥雀斑美顏色

丹竈泥

嶺南雜記出羅浮山以粉紅色者佳○粵志羅浮

沖虛觀後有稚川丹竈取竈中土以藥槽之水洗之丸小粒投水中輒有白氣數縷沖射四旁生泡不已哈哈有聲頃之一分爲二二分爲四四分爲八然後融化服之可療腹疾道士號爲丹滓嘗以餉客

治暈船不服水土等症 丸如豆大飲水調服

洗手土

坤輿典雞足山有迦葉洗手土彼方人若頭痛者以些少塗之卽瘥

觀音粉

處州府志雲和山中有白善泥以水攪研而取之
和糯米粉一半蒸食之可以療飢名觀音粉○生
山土內白如粉絕細膩歲荒鄉人輒掘取之和麥
麩作餅餌以食但不可多食多食能令便閉腹重
以其土性滯澀腸胃耳生洞內者不可服恐其有
蛇虺涎毒○鄭仲夔冷賞載云丙子歲荒弋陽石
窩村庵僧夢大士告以山下土中有石粉可取充
飢如言往掘果得之儼若蕨粉研細作餅蒸熟甘

美異常鄉人聞而競採之或有以葷油裹者卽苦甚不堪入口名大士粉卽此○綱目石部載石麩卽此以爲不常生不知今山中皆有瀕湖主治止言益氣調中食之止飢而不知其去溼之功十倍於蒼朮蓋亦土能制水之意耳

味微甘苦性平解蟲毒逐水腫明目療溼黃

烏龍粉

丹術家名黑龍丹係燒馬糞釜臍煤

生肌收口藥用之摻瘡口卽驗

白硃砂

一名翠白古方有用之乃舊定窯器末也近窯火氣未脫有毒能腐肉不宜服○青磁末曰翠青本經逢原白磁器研細水飛傅癰腫可代鍼砭又點目去翳○百草鏡云白硃砂係古磁白色者研粉入藥以其年久無火毒之害必不得已用破碎定窯入土過者火煨醋淬研細水飛用今人以近日窯器白色者代用誤矣○按外科有九種十三根法凡種癰留根有白莖種能令患毒不收口時以

取利今逢原用以傳癰腫恐種毒留根不宜誤用
或加入膏中以代鍼可也然亦以少爲貴

接斷骨神效方○黃氏醫抄研極細末同黃蠟丸
酒吞三錢取汗出骨接有聲片時卽復

去翳障○得效方有點眼翠白丹用之錄驗方有
推雲散翠青翠白同用○醫學指南目疾門有撥
雲能光散中用白硃砂以童便合醋煨製二十一
次方用

遠近星障○眼科要覽白硃砂牛黃熊膽白丁香

珍珠冰片各一分石燕石鱗琥珀珊瑚各三分爐
甘石煨三錢麝香半分共爲細末蜜一兩調點
鼻血不止○慈惠編定窰磁器乳極細末吹少許
入鼻孔內立止

治膈○義復方用白磁片燒紅醋淬七次研極細
末燒酒服三釐

臙瘡起沿○白硃砂煨紅淬入乾燒酒內四兩七
八次以酥爲度研細水飛每上藥一錢加冰片三
釐研細摻之黑膏藥蓋貼孕婦勿服能墮胎慎之

鱗損頭○葉氏方用細磁器爲末香油調塗立效
治跌打閃衄傷方○白硃砂卽回青磁器用火礮
燒紅童便淬七次研成粉淨用三錢乳香沒藥俱
去油各一錢三味研爲細末用好黃酒送下三日
一服三服全愈

難產催生○便易良方白細盃研碎末一錢酒吞
下立刻卽產

綱目四卷主治內云白磁器水磨可滅癥痕

鑄銅罐

雲溪方浙江湖州人每擔爐具赴他州代人鑄銅
杓鍋鏟其泥罐不輕棄可入藥

治小兒頭生軟癩出膿水不乾仍復癩腫用罐石
上搥細末醋調敷之膿自溢乾迨泥落而疾自愈
白蠟塵

此乃白蠟面上年久積塵掃下貯用

治療蟲 萬邦孚家抄

檀香泥

乃檀香心中所含脂垢不易得色如塵土故以泥

名熱之亦作檀香氣

治胃氣滯痛肝鬱不舒

席下塵

治水腫 聖惠方治遍身水腫用鹿葱根葉曬乾
爲末每服二錢入席下塵半錢食前米飲服

回燕膏

本草經疏朝北燕窠土名回燕膏

治瘰癧○經疏合胡燕窩內土研敷有效

鞋底泥

瀕湖綱目引藏器本草治不服水土用而外治無聞焉今補之

治聾耳頭瘡○良朋彙集人生耳底卽聾耳用鞋底陳土吹入耳內卽乾此土又治頭上瘡不乾擦上卽好

一切無名腫毒○用獨郎蒜一枚津唾磨鞋底泥箍之三五次卽消

鼠穴泥

治偏正頭風○救生苦海用老鼠洞內泥炒熱乘

熱絹帕包頭上卽愈

椅足泥

物理小識此泥炕乾可以生肌

狗溺硝

此藥處處有之生人家石墘上鄉村尤多乃狗溺石上多年結成如硝樣取之水飛用或甘草湯拔去穢氣用

性涼色青白治咽喉腫痛等症能降虛火

雞腳膠

出雲南雞足山近地土中俗名雞腳膠土人往往從土中掘得形如碎磚入火卽烱如膠然故名終不知何物所結也

治風如神煎湯服

烏金磚

乃糞窖中多年磚也取起一塊洗淨以清水煎熬撇去浮沫候浮沫淨其汁亦濃每一二盞治痘不貫漿虛弱無力者大效

蛆鑽泥

乃糞坑中蛆鑽之泥其質鬆凡蛆在泥中過冬必鑽此土作窠蛆過冬則短縮頭生二角白如蛹清明後化黑蟲而去蛆必退殼每退每大其退時輒扒越牆石從高墜下退一節再扒再墜如是屢次則全退矣此泥有蛹故入退管藥用須冬時取

治痔漏多年起管○用蛆鑽泥一斗曬乾以五升炒熱袋盛令患者去褲坐其上則稠水膿血淋下久之泥冷再用五升炒熱接盛坐之如此一袋坐一袋復炒泥炒熱又易換數次則稠膿自盡三度

後管自退出又不傷人屢用屢效之方也

本草綱目拾遺金部目錄

鐵線粉

開元錢

萬曆龍鳳錢

菜花銅

風磨銅附

白銅礦

白銅附

紫銅鈔

金花鈔錫鈔附

錢花

馬口鐵

金頂

烏銀

子母懸

銀銷

金部

鐵線粉

色黑產廣中以香炷點之有烟起如蚊子飛者眞陳廷慶云色白者眞此乃鎔鐵鍋中浮起白沫如枯礬者若色黃黑者假

治癬神效 多年頑癬久不愈者先以薑擦患處後以粉傅之○百草鏡云用醋調搽忌薑椒一切發物○楊春涯驗方云廣東剔癬粉治癬神效其色如沈香末則是鐵線者乃剔癬之訛也

兩腿陰面溼癬 毛世洪經驗集以葶薺蘸鐵線

粉擦之立瘥

鐵線粉卽火炮中刮下鏽粉也

粵中洋行有船上鐵

絲帶來出售中土日久起鏽用刀刮其鏽明亮如
新所刮下之鏽末名鐵線粉其色黃如香灰帶白
色者乃鎔鐵浮起鍋中白沫搗細而成亦名鐵線
粉廣中有此二種

開元錢

附萬曆龍鳳錢

無顏錄唐開元錢燒之有水銀出可入藥以有楊
妃手掐痕者佳以火煨紅淬醋中六七次用入目

者磨用入散者同胡桃研成粉用明目醋煨入眼科治小兒急慢驚風○楊仁齋直指有孔方兄飲治慢脾驚風利痰奇效用開元錢背後上下有兩月痕者其色淡黑頗小以一個放鐵匙上炭火燒四圍上下各出珠子取出待冷傾入盞中作一服以南木香湯送下或人參湯亦可錢雖利痰非胃家所好須以木香佐之

禁口痢 張氏必效方開元古錢一個火煨醋淬以錢化爲度研細末拌粥內食之如十分沈重併

粥不能食者以溫開水調下一二時辰卽思飲食
矣然後用薄粥漸漸開導再用調理脾氣自愈

折傷接骨 槐酉雜志交河黃俊生言折傷接骨

者以開通元寶錢燒而醋淬研爲末以酒服下則
銅末自結而爲圈周束折處曾以折足雞試之果
接續如故及烹此雞驗其骨銅束宛然此錢唐初
所鑄歐陽詢所書其旁微有一偃月形乃進樣時
文德皇后誤掐一痕因而未改也其字當迴環讀
之俗以爲開元錢則誤矣○周氏方治跌打損傷

用開元錢一個醋煨和酒服至重者用二個立愈
○古方選註云唐時開元錢亦可入藥功專腐蝕
壞肉○陳藏器曰能直入損處鐸人斷骨

廣志自河頭至高廉二郡皆用唐宋錢開元錢以
平頭元爲上尖頭元次之有萬厯錢則以跋厯爲
上以厯字左撇直下也○古錢皆可治病如漢之
五銖秦之半兩其質薄多青綠剝蝕痕醋煨入眼
科綱目已載之世亦多有知者秋燈叢話載順治
初湖南孝感縣民多病瘧或於古錢中檢開元通

寶錢一文持之卽愈遠近喧傳每文價值制錢一
緡若是則又不止開元錢可用也然準古酌今入
藥惟開元錢爲當故特爲拈出以廣其用○王楙
野客叢書唐之錢見於今者有二開元通寶與夫
乾元重寶按食貨志開元通寶高祖時鑄徑八分
得輕重小大之中其文以八分篆隸三體洛并幽
益桂等州皆置監賜秦王齊王三爐右僕射裴寂
一爐高宗復行開元通寶錢天下皆鑄之元宗亦
鑄此錢京師藏皆徧天下而乾元重寶錢肅宗命

第五琦鑄錢徑一寸每緡重十劬與開元通寶參
用以一當十琦爲相後命絳州鑄此錢徑一寸二
分每緡重二十劬與開元通寶並行以一當十乾
元錢惟肅宗朝鑄而開元錢鑄於累朝所以至今
尙多○按開元通寶錢有二種一種有手掐痕儼

如月眉輪廓微仄銅色頗古卽世所稱楊妃手痕
者閱譚賓錄載錢文如甲跡者因文德皇后也武
德中廢五銖錢行開元通寶錢此四字乃歐陽詢
所書初進樣后掐一甲痕因鑄之始知今所傳乃

開通錢也存以備考

萬厯龍鳳錢 婦人臨產置錢一文手掌內可催生

朱文藻
附記

菜花銅 風磨銅附

藥性考此天生者今之黃銅乃赤銅合爐甘石煉成

味辛宜製刀切藥性味不改打箔用入損傷劑能
斂金瘡傷口強脾益肺除一切風痺

風磨銅 生西番置風露中色燦如金佩之除一切

風疾

白銅鑛

白銅附

此乃礦中白銅質脆今時用白銅以赤銅砒石煉成有毒不堪用

辛溫治風散毒敷牛馬瘡亦續筋骨

白銅 辛涼鎮氣不足益肺下痰伐肝明目

藥性考

紫銅鈔

金花鈔

錫鈔附

藥性考產雲南入藥鎮心利肺降氣墜痰火煨末用可罨續筋骨折傷

金花鈔 藥性考與紫銅鈔相類主治亦同

錫鈔 藥性考有毒磨塗疔腫

錢花

藥性考此乃鑄錢爐中飛起黃沫輕鬆者佳

主敷騾馬迎鞍瘡

馬口鐵

一名馬銜鐵乃馬口中嚼環是也其性愈久愈軟市人以之打簪鐲戒指偽充銀器儼如真者或以作包金地子皆好年久者質軟更得馬之精液入

藥良

味辛煎湯治小兒驚風

金頂

品級考頂製以銅外鍍以金七品以下皆純鍍金
七品以上則嵌珍石不同入藥取純銅鍍金色舊
難用者良先以甘草煎湯乘熱洗用

治頭風及口眼喎斜 傳信方袁良臣云煎湯煮
藥有效舊雀頂更妙

絕邪瘧 余機云取年久色舊純金頂一枚以紅

絹囊盛之藏臥席下勿令病人知自愈按頂製加於冠首日受陽氣熏浹又得風日之氣年久者得氣愈厚凡金之屬皆能尅木風屬巽巽爲木故能治風斜絕邪瘡者亦取正氣以定之耳

烏銀

綱目銀下附烏銀言用硫黃熏銀則色黑成烏銀養生家製爲器盛露飲之長年辟惡止載其服食功用而不言有治病之用故從行篋檢祕方得其法以補之

治翻胃如神用紋銀一錢二分硫黃一觔將硫黃分作一百二十包取大傾銀罐一個將銀放入罐內炭火上煨將硫黃逐包投入罐內黃盡爲度取銀爲末初次服三分二次服二分三次服一分再加丁香茴香藿香沈香各三分麝香一分分爲三服每服用銀粉二分水一鍾煎藥至半鍾將銀粉空心送下作三日服完卽愈

子母懸

翟筠川掌記子母懸出貴州鉛礦中乃鉛之精氣

所結得其大者成塊有數十觔生鑿爲洗盆沐頭
面髮至老不白明目去癩痣澤容潤肌凡人面有
紫黑癩記久沐盡去

解毒去疣贅息肉烏鬚髮明目

銀鋪

一作糶

此乃傾銀鋪鎔銀腳也凡鎔銀入罐必多用消及
礪砂黃砂以去鉛銅雜腳則成十足成色爲紋銀
其罐底所餘黑色滓渣名曰鋪有毒不可悞食食
能墜人腸此物無入藥用者故綱目銀下附烏銀

雖無主治尙列其名而銷未及焉者或以其毒而棄諸人有誤食者急用黃泥水服二茶盞可解或每日用飴糖四兩作小丸不時以芝麻油吞下俱可瀉其毒出須服至百日外無患○經驗廣集服銀銷水者烏梅湯灌之卽解○楊春涯驗方誤食銀釉帶皮綠柿連喫數十枚冬日喫柿餅茱萸汁可解神妙

治癰 救世青囊凡頑癰用銀銷不拘多少盛磁盤內安放露天將盤微側使銷沾露有水流下抓

破搽之

內府萬應膏

慈谿陳水東得來用銀銷一觔黑

芝麻油二觔先將銷入油內浸十日敲碎同油煎至四五分熟用絹袋濾去銷入炒過飛淨東丹一觔熬成膏治一切無名腫毒癰瘡痔漏發背疔瘡一貼卽愈

五雲膏

不藥良方治馬刀瘰癧又鼠瘡已潰者

用銀黝子四兩搥碎黃丹八兩飛淨香油二十兩用砂鍋一個盛香油火溫候油熱將黝子投入油

以桃柳桑槐棗五枝攪之候起珍珠花撈去渣用
布濾淨復將油下鍋慢慢將黃丹篩入油內仍用
五枝不住手攪之以滴水成珠爲度取出收貯用
時勿見火以重湯炖化紅緞攤貼

本草綱目拾遺石部目錄

吸毒石

天生磺

倭硫黃

石腦油

神火

天龍骨

玉田沙

瑤池沙

木心石

樟巖附

仙人骨

禹穴石

桃花鹽

瘤卵石

松化石

雲核

瀚海石竅沙

巖香

龍窩石

石髓

紅毛石皮

金精石

雄膽

雉窠黃附

石螺螄

貓睛石

辟驚石

奇功石

保心石

石部

吸毒石

袁棟書影叢說云吳江某姓有吸毒石形如雲南黑圍棋亦有白色者有大腫毒者以石觸之卽膠黏不脫毒重者一週時卽落輕者逾時卽落當候其自脫不可強離也強離則毒終未盡俟其落時預備人乳一大盃分貯小盃以石投乳中乃百沸踴躍再易乳復沸如前俟沸定則其石無恙以所吸之毒爲乳所洗盡也否則石必粉裂云得之大

西洋○嶺南雜記出西洋島中毒蛇腦中石也大如扁豆能吸一切腫毒發背亦可治今貨者乃土人捕此蛇以土和肉舂成如圍棋石子可吸平常腫毒及蜈蚣毒蠍等傷置患處黏吸不動毒盡自落浸以人乳變綠色卽遠棄之不浸卽裂下次不驗真腦中石置蛇頭不動者真○張棗猗言吸毒石乃蛇蟄時口中所含泥驚蟄後吐棄穴畔人取貨之按庚辛玉冊云蛇入蟄時含土起蟄時化作黃石並無此事如棗猗所言縱有之亦蛇銜土耳

何能吸毒耶○泰西石振鐸本草補云吸毒石又名蛇石有兩種小西洋有毒蛇頭内生一石如扁豆仁大能拔除各種毒氣此生成者也土人將蛇石并本蛇之肉與本地之土爲末造成如圍棋子大此造成者也小西洋用蛇石大西洋惟用藥製凡遇蛇蠍蜈蚣等傷及癰疽大毒一切惡瘡用此石置患處則緊黏不脫其毒吸盡則解脫須防墜損以絲氈等盛之吸時只可一二時不脫亦當摘下否則石碎脫離時急用乳汁浸之或人乳不便

牛羊乳亦可搜牽乳汁略變綠色或黃或黑是其毒盡也或諸乳皆無以溫水浸之亦可浸之稍遲石卽受傷不可再用矣旣浸之後又以清水洗淨抹乾收貯但所浸乳汁有毒在內須掘地坑埋之免傷人畜或患處無血用小刀刮損微見血出方能黏也或預服解毒傷藥內攻再用此石吸之更妙如試此石置毒蛇頭上蛇卽不敢動然亦必須乳汁浸如前法則石不傷蓋一試之頃蛇毒亦在內也○紀曉嵐先生灤陽消夏錄云小奴玉保烏

魯木齊流人子也初隸特納格爾軍屯嘗入谷追
亡羊見大蛇巨如柱盤於高岡之頂向日曬鱗週
身五色爛然如堆錦繡頂一角長尺許有羣雉飛
過張口吸之相距四五丈皆翩然而落如矢投壺
知羊爲所吞矣乘其未見循澗逃歸恐怖幾失魂
魄軍吏鄔圖麟因言此蛇至毒而其角能解毒卽
所謂吸毒石也見此蛇者攜雄黃數斤於上風燒
之卽委頓不能動取其角鋸爲塊癰疽初起時以
一塊著瘡頂卽如慈吸鐵相黏不可脫待毒氣吸

出乃自落置之乳中浸出其毒仍可再用毒輕者
乳變綠稍重變青黯極重者變黑紫須吸四五次
乃可盡餘一二次愈矣予從兄懋園家有吸毒石
治癰疽頗驗其質非木非石至是乃知爲蛇角矣
敏按吸毒石曉嵐先生以爲卽大蛇之角萊猗以
爲蛇含土恐皆非是瀕湖綱目蛇角一名骨咄犀
引輟耕錄及松漠紀聞曹昭格古論諸書止言能
治癰毒並無吸毒之說書影叢說及嶺南雜記皆
斷以爲石其說詳核可從故列石部兼采諸說備

證至蛇含土乃蛇黃也與此更迥別尤不辨自明
治一切無名腫毒及毒蟲傷以石吸之立愈

天生磺

毘陵劉霽軒先生諱煥章任浪窮令有天生磺紀
略曰浪窮東城外五里有溫泉焉乃昆明海洱之
委也周圍三四里許泉底產硫磺水熱如湯投以
雞蛋可熟中流峙一平巖名九氣臺中空而旁穴
穴凡九溫泉注其內其氣熏蒸上浮於石沾濡流
浹如垂乳然積時既久質漸墜色甚瑩白歷數百

餘年其色灰蒼堆聚巖下魄碕玲瓏與巧石相似
土人鑿取之以爲藥其性大溫補命門眞火虛寒
等症服之厥效如神蓋硫黃泉之熱氣所結質最
輕清又久而後成故功效遠過於石硫黃也今土
人建文星閣於九氣臺上爲浪邑勝跡云

治膈症補命門火衰餘功同倭黃

按西儒高一志空際格致云硫黃有人造者有天
生者天生者外如灰色內如黃泥而淡其體濃肥
其味苦鹹其氣臭毒其性燥熱故近火則易爲養

也

倭硫黃

出東洋琉球日本呂宋等國以日本者佳其色白似蜜氣不臭烈光潤而嫩高濂四時修合方云舶上硫黃倭夷海船上作灰塗縫者佳人不多見俱以市硫有油者用舶硫色如蜜者黃中有金紅處如七月石榴皮打開儼若水晶有光全非鬆脆性如石硬者眞按硫出內地者取土與油煎熬而成氣腥觸鼻作老黃色倭產者嫩白瀕湖集解但引

庚辛玉冊所載石土二種於倭硫卻無考據僅云
倭船者佳不知倭硫黃與內地迥別也其附方內
所載本事方之陰證傷寒博濟方之陰陽二毒瑞
竹堂方之酒齏赤鼻宣明方之鼻面紫風皆用船
上硫黃者斷不可以內地臺黃代用故補著其功
於左○百草鏡白硫黃出琉球國名倭硫黃洋船
帶來質堅如石不臭光潤滑澤形如滴乳者眞○
物理小識船硫如蜜黃中有金紅處擊開如水晶
有光今青硫不佳也蓋陽氣入地遇水則死爲硫

升雲則爆爲雷乃生養萬物之源故以金紅者爲
第一種但須善製耳遇硫毒研釜底煤泡湯飲以
煤爲火之宅硫本陽火見而服也○岳巖使秀峯
先生會語予曰在京師見倭黃如梅花式成餅色
亦不甚白握手中置耳畔聽之索索作聲如蟲鳴
云此種係倭舶來者特筆於此以候考

性大熱味微酸有小毒補下元助陽道益命門火
衰於老人尤宜滅斑殺蟲治瘡通血止瀉痢

煖肚封臍膏 周氏家寶云夏天貼之秋後不生

痢疾用韭菜子蛇牀子大附子各一兩肉桂一兩
川椒三兩倭硫黃一兩麝香三分獨蒜一枚麻油
三觔入粗藥浸半月熬至枯色去渣熬至滴水成
珠再加黃丹十二兩再熬俟冷加細藥聽用

孕婦忌貼

登仙膏 萬氏家抄云此藥存精不漏固體壯陽

強形健力凡交不泄可採十女之精兼治腰疼下
元虛損五勞七傷半身不遂膀胱疝氣下焦冷氣
小腸偏墜又治二三十年腳腿疼麻陽事不舉婦
人白帶血淋陰痛血崩皆宜貼之麻油一觔四兩

入甘草二兩熬至六分下諸藥 第一下芝麻四
兩 第二下甘草二錢 第三下天門冬酒浸去
心麥冬遠志俱酒浸去心生地酒洗熟地酒蒸牛
膝去蘆酒浸蛇牀子酒洗虎骨酥炙菟絲子酒浸
鹿茸酥炙肉蓯蓉酒洗去甲膜川續斷紫稍花木
鼈子去殼杏仁去皮尖穀精草官桂去皮各三錢
文武火熬至枯黑色去渣下飛過黃丹半觔 第
四下松香八兩槐柳枝不住手攪滴水不散 第
五下倭硫黃雄黃龍骨赤石脂各爲末二錢再上

火熬半時 第六下乳香沒藥木香母丁香各末

五錢再熬離火放溫 第七下蟾酥麝香陽起石

各二錢滴水不散 第八下黃占一兩用磁罐盛

之以蠟封口入井中浸三日去火毒用紅絹攤貼

臍上如行房欲泄以婦人唾津潤去膏藥卽泄便

有孕

應昌按御女之說適足以戕生也種子之說亦足以導淫也貽誤多而成功少觀者慎諸

寶珠膏 行篋檢秘此藥能助筋骨補血長肌固

元未貼此膏之前先用擦久易丹擦腰眼三日後

再貼此膏赤石脂天冬麥冬生地熟地紫稍花蛇

牀子鹿茸穀精草防風元參厚樸虎骨菟絲子木
香各一兩母丁香肉桂川斷赤芍黃芪肉蓯蓉白
龍骨杜仲各一錢五分附子一個生用蓖麻子一
百粒去油穿山甲一錢五分地龍去土二錢木鼈
去殼不去油切片倭硫黃沒藥各一錢血竭一錢
乳香二錢松香黃蠟各四錢麝香少許用麻油二
觔將藥入油浸三日後入鍋內熬至黑色去渣用
槐柳枝攪次下黃蠟松香再下細藥油滴水成珠
不散爲度磁器收之絹緞布攤貼腰眼其效如神

擦久易丹 肉蓯蓉良薑蛇牀子丁香馬藜花韶
腦各一兩木鼈蟾酥少許爲末煉蜜爲丸如彈子
大每用一丸擦腰眼千百遍軟絹綢護之一日不
解三日後貼前寶珠膏

七寶丹 高濂修合方治久患瀉痢療不瘥者服
之卽效老人及脾洩滑宜服用附子童便和黃泥
炮五錢當歸一兩乾薑五錢吳茱萸厚樸薑製花
椒各三錢舶硫黃八錢七味爲末米醋和成兩團
白麪和外衣裹藥在內如燒餅包糖一般文武火

煨麪熟去麪搗爲末蜜丸桐子大諸痢米湯下二
十丸空心日午服宿食氣痛不消薑鹽湯下

神效乾丹

演撰兒集此藥堅陽益腎強筋力和

血脈種子如神天雄三錢去皮尖雄精三錢鴉片
三錢蟾酥三錢母丁香大者四粒人參三錢樟腦
瓦上昇淨霜三錢乳香沒藥去油各五分倭硫黃
三錢共研細末用絹羅裏外麝香二錢研極細另
包將白芨不拘多少以敷用爲度放盃內用滾水
泡開將白芨裝入絹袋內攪淨去渣再用蘇合油

三錢同白芨對和藥調勻將麝香末灑上做成錠
放磁盒內陰乾或將口封固略曬俟乾研擦

剪根丸 經驗廣集治胃氣一服除根冷痛尤效

元胡索胡椒五靈脂白荳蔻各五錢倭黃如無用
石硫黃水浸早晚換水取出用磁器鎔數沸於土
地上候冷再用水泡過洗淨一兩木香切片曬乾
二錢五分研細末拌勻收貯體壯者服一分弱者
八釐老人幼童五釐取溫燒酒半小鍾調服入密
室一切食物不可喫待次日喫稀米湯至五日後

方可喫乾飯永不再發孕婦忌服

石腦油

出陝西延安榆州等處乃石中流液土人取之格物須知云石腦油真者透金銀惟真琉璃可貯又水涓滴烈焰遽發餘力入水魚鼈皆死撲之以灰則滅常中丞宦遊筆記西陲赤金衛東南一百五十里有石油泉油生水面如肥皂色黑氣臭土人多取以燃燈極明可抵松膏或云可治瘡癬○筆談廊延脂延安石油也生於水際沙石與泉水相

雜惘惘而出土人以雉尾裹之入缶中頗似漆
之極明元和志石油泉在玉門縣東一百八十里
泉中有苔如肥肉燃之可代燭此油能於水中發
火如燃此油沃以水其光愈熾以灰撲之則滅按
此卽古之石漆也漢書註延壽縣南有山石出泉
漾漾如不凝脂燃之極明不可食縣人謂之石漆
張華言延壽縣南山有溝脂始黃後黑謂之石漆
方鎮編年錄謂之地脂時珍以爲石腦油一日硫
黃油今雲南緬甸廣之南雄皆有之○聞見雜志

蜀富順縣火井先以木火下引而上用大竹破半
去節火由內行可引入竈下煎鹽其火色青綠不
紅井中油用紙布撚燃入水沈底不滅搽瘡癩立
愈此亦石腦油之類○北史屈茨川在龜茲國西
北大山中水如膏流出成川行數里入地狀如飴
餈甚臭服之齒髮再生癘人服之亦愈此亦石腦
地洩之類○通志略龜溺亦名石腦油與此別
治白禿堆灰俗名狗屎蠟梨瘡剃頭以此油塗上
立瘥又治頑癬風癩惡疥

本草綱目拾遺 卷一
無名腫毒 救生苦海緬甸出石油卽石腦油在
石縫流氣臭惡不可聞色黑用塗惡毒良又治癩
毒

東西洋考三佛齊在東南海中本南蠻別種後爲
瓜哇所破更名舊港產猛火油樹津也一名泥油
大類樟腦第能腐人肌肉燃置水中光焰愈熾蠻
夷以制火器其烽更烈魚鼈遇者無不焦爍敏按
此卽石油觀其一名泥油可知非樹脂也洋考悞
以爲樹津故取附石腦油下

神火

救生苦海有取神火法用劈砂一觔帶水研細以滾水沖之面上有浮起細沫一層用荆川紙拖水面其沫卽黏著紙上將紙曬乾掃下卽神火也其砂澄清去水再研再沖見有浮起沫依前法拖曬如此六七次直至無浮沫方止每砂一觔約可取神火八九分用烏金紙包收貯

性能拔毒收口凡癰疽毒瘡難收口者以神火少許鷺翎蘸掃膏藥上貼毒水易乾瘡口易斂爲外

科聖藥

天龍骨

乃千年塔頂石灰也瀕湖石灰條下附古墓中石灰名地龍骨鯢舡油石灰名水龍骨而獨遺此特補之盛再華云塔上石灰受天陽風露之氣變悍烈之性而成溫和故能定痛生肌止血去溼爲金刃要藥內服亦良

外治止血生肌塗惡瘡腫毒寒溼癰瘡內治心腹痛烏痧脹婦人血崩漏帶男子久痢便血及一切

打撲損傷惡血凝聚腹痛欲死者俱可服

白虎丸 治一切青筋腹痛萬氏家抄天龍骨不拘多少去泥土水飛過丸似桐子大每服五十丸看輕重加減燒酒下初覺頭痛惡心腹脹卽進一服當時血散若過三五日青筋已老者多服取效

玉田沙

本經逢原云夏月發癩疹用之良亦河沙中之一種也

綱目失載

瑤池沙

朱排山柑園雜識喇嗎嘗進瑤池水水香如蓮色
白而重以玻璃器貯之數百年不涸不變人飲之
能療百病康熙五十三年遣理藩院員外盛柱取
之自京出西甯口望西北行凡七千里至星宿海
卽世所稱火敦腦兒也更西北行三千里達崑崙
山山形如桃皆積雪人不能上測影高三百餘丈
山前名孔雀門後名馬門左名獅門右名象門山
四隅各有一山皆低於崑崙孔雀門內有池名麻
蓬達嚩華言天河也四山之水合流於天河河水

伏流至星宿海復流入中國去崑崙西北四五里卽瑤池池匝百八十里岸傍皆雪水中有五色細砂滑膩可食取水一瓶并圖山川風土而歸往返凡二年零六月

稀痘取沙與小兒常食之卽永不出痘

木心石

樟巖附

生古木中圓如雀卵中色正白著木處燦如黃金書影叢說有孝子某母嘗患心痛日久不瘳孝子日禱於神求治一夕夢神曰爾母疾必得木心石

乃愈醒而遍訪名醫皆不知此藥一日入山忽有
二匠解木下鋸有聲孝子乃悟急止告以故視鋸
下有石持歸磨酒與母服痼疾頓除

治心痛

按造化之用無風不能生物無火不能結物故萬
物之動者皆生於風萬物之靜者皆凝於火觀於
火死而質不朽可知木性疎達得風以生之是以
自萌而芽而苞苞坼而花而實皆得風以散之故
春榮秋落如有知也其實與脂質之靜者均屬於

火火爲木子所以樹老則自焚火鬱必泄也木心有石乃風不能散火鬱於內又不得泄致其脂液凝聚至精者久則變爲石餘者皆朽如松脂成琥珀柏脂成瑪瑙所謂物物有一太極也心爲人身之太極主中宮而至靈以至變之物治之則合同而化故能愈此疾論事雖變而論理則常也

樟巖 沈氏秘檢樟樹內有石名樟巖

治心痛能通五經煨研煎酒服

仙人骨

輿地志雲南鎮南州山中出碎石如朴消土人掘取作粉貨之相傳仙人曾化於此因名焉○南詔備考鎮南州城東二十里山中世傳仙人張明亨遺蛻瘞此

治一切瘡神效取粉敷

杜昌丁藏行紀程楚雄府七十里至呂合有呂祖廟去村數里山腳出仙人骨如水晶能療瘡癩相傳仙人爲呂祖所度又三五十里爲鎮南州

滇略南詔時張王二生遇呂仙於呂合驛王得度

上昇張不能從憤而死埋骨山中化爲石瑩澈如水晶傳一切瘡瘍立愈

禹穴石

產四川龍安府石泉縣石紐鄉以紅如潁血者佳四川通志出石泉禹穴下石皮如血染氣腥以滾水沃飲之能催生

治難產

桃花鹽

柑園小識桃花鹽產澤旺每春深紅如桃花至夏

紅色漸減秋冬色白入春仍紅胃痛人炙鹽熨之立止

治胃痛以鹽熨之立止

癰卵石

池北偶談高陽民家子方十餘歲忽臂上生宿瘤痛癢不可忍醫皆不辨何症一日忽潰中有圓卵墜出尋化爲石劉工部霖以一金售之用治膈症如神

治痞結膈症

松化石

唐書僕骨東境康于河斷松投之輒化爲石其色佳謂之康于石○錄異記婺州永康縣山亭中有枯松因斷之誤墮水中化爲石取未化者試於水隨亦化焉其所化者枝幹及皮與松無異但堅勁博物志云松本石氣石裂受沙卽產松松至三千年更化爲石○輿地紀宋建炎閒遂甯府轉運使衙門後圃有松石外猶松樹而中化爲石又重慶府永川縣有石松坪有松化石石質而松理或二

三尺許大可合抱然不過相望數山有之俗呼雷
燒松神仙傳三千年當化爲石○張萊漪塗說松
化石有黃紫二色質理甚細皮上有水紋或松皮
紋亦有節暈紋者天台山間有之西北亦產乃年
久折松入澗水得地氣變石且有變不全尙帶松
質者入藥宜用全化者服之令人忘情絕想

治相思症凡男女有所思不遂者服之便絕意不
復再念

敏按松化石乃有情化無情爲陽極反陰之象男

女愛慕結想成病致君相二火虛磨妄動鑠耗眞陰魂狂魄越神不守舍非此反折之使入和平不可正取其貞凝之氣以釋妄緣也瀕湖石部不灰木後附松石云松久所化不入藥用殆未深悉其奧妙耳

雲核

羅浮志雲核出羅浮亦雲母之類黃者出黃雲峯白者出白雲峯屑之調爲漿服之久能吞吐五色雲

性平服食用之延年卻病功同雲母

瀚海石竅沙

朱排山柑園小識瀚海石出瀚海地近澤旺爲方
三百里無水草其石大者如瓜如拳小者如芋栗
亦有如珠如豆者皆具五色如瑪瑙有竅而中空
其竅中有沙可入藥石質堅其外可碾其中不可
碾故每因形成器

主明目

巖香

深山皆有之凡山巖洞壁上有泉滴下年久其水流處則生水結乃至陰之精華憑石乳滋液乘風力而結者土人名巖香俗呼水齧鑿石取之色白如窯灰置手中冷入骨者眞

百草鏡云性寒敷湯火傷金瘡出血用水礮火煨醋淬研末同白果肉水浸擣汁和服七分可治白濁亦入眼科用

龍窩石

名勝志出廬山溪中及有龍居之所此石夜覺涼

冷者眞王伯厚云深山有龍蟄處皆有之土人俟龍升去乃跡而獲之有五色以透明者煨用生用有毒敲碎投醋中片片能動而相合者良

性大寒磨面能滅癩痕解熱瘡毒煨粉撲暑癩立消

按龍體純陽凡陽之體以陰爲用故其蟄處石皆性冷入夜更涼者眞陰爲用也投醋中輒能相合者龍乃東方之神應木木味作酸石感精氣所以遇醋而能合其功能解熱滅癩亦取其寒斂之性

以奏效耳

石髓

福建續志石髓出泉州安溪長潭石罅間接骨如神療內傷折骨酒研三分服能接斷骨不可多服多則骨大

紅毛石皮

出粵澳門來自紅毛國中國用作火石外皮白如粉甚鬆脆番人去其皮其中石質售爲火石皮不甚貴重任人搬取

拾金刃傷以石皮搗粉功勝千年石灰云可以黏
合皮膚裂痕

金精石

福建續志出永春州雙髻山等處其石似鐵礪而
鬆色如黃金○本草綱目金星石集解後引劉河
閒宣明方點眼藥中用金精石時珍疑以爲卽金
星石蓋未見續志也

去翳明目入眼科用

雄膽

雉窠黃附

六研齋筆記王存思太僕貴陽人云其土多山出
雄黃有大至數百觔者中有浮沙成團如鷺卵曰
雄膽破之有清水盞許急飲之沈疴俱消壽二百
歲特以山民頑獷遇之不謹卽散漫不得飲耳有
一人飲之至今猶在健如三十許人自言百五十
餘歲矣

殺三蟲毒除癩疾駐容延年

雉窠黃

簪雲樓雜記雉窠底有雉黃黃氣遠射能辟毒物

鄉人三四月中徧覓之爲市其取黃法先以溺繞窠三市從而掘之所獲約二三兩價倍於他產

海外三珠有轉胎法五月五日午時取金鍼花葉俗名鶯腳花單葉名金鍼花陰乾聽用婦人孕滿月四十日之前將雉窠黃揀明透重一兩一塊者用葉包裹三四張再用布包縫上孕婦腹前貼身衣上候四十日分娩生男不生女

解一切毒蛇咬傷辟邪魅山精

按雉窠有黃猶鶴窠有礬所以助陽氣能令子不

鰕也千金方有轉女成男法用雄黃養胎取其陽
精之全於地產則雉蓋不獨取以解毒也竊謂雉
之精氣响伏既久人得佩之可解一切產厄於孕
婦尤宜

石螺螄

百草鏡出廣東修治與石燕同

治瞽目眼疾

按石螺螄形似螺而體質則石也亦石鱗石蛇之
類故主治亦大略相似

貓睛石

墨莊漫錄宣和閒外夷貢方物有石圓如龍眼實色若綠葡萄號貓兒眼睛能息火燃炭方熾投之卽滅按此卽寶石中一種貓兒眼也今雲南緬地寶井中有之

解蠱毒

辟驚石

一名避驚風石本草補云西巴尼亞國有一處土中產石色黑而光嫩取而琢之或大或小佩孩童

胸前遇邪風而起慢驚急驚此石代受其患邪氣盡收於石內自然裂破孩童無恙必須常佩永遠方可無虞真可寶之物也

治急慢驚風一切天鈞尸症

奇功石

出大西洋形狀無可考本草補云此石能治婦人產難凡遇產難者用芝麻油一鍾放此石在油內浸一宿後用此油擦婦人肚面卽無難產之患或用此石綁在婦人大腿上卽產產後隨時除去凡

遇發擺子

中華名瘧

身熱或心中脹悶或胃氣疼痛或

痰滯及錯食毒物等患將石或泡酒一盃水一盃浸一宿取此酒石用手擠一擠令此石氣汁下酒水內空心飲此酒水即愈○血熱瘡疥飲此酒水并塗抹患處即愈患眼將此酒水或飲或洗皆妙

保心石

本草補生鹿腹中鹿食各種解毒之草其精液久積結而爲石亦名寶石有二種一是鹿獸生成一是泰西名醫至小西洋采珍藥製成服之令毒氣

不攻於心故曰保心石用法以刀刮如麥大者六粒爲粉調服多用亦無害更增加精神常服此藥酒水隨人能令腹中不多生蛔蟲體健神旺

治大熱燥渴小便不通泄瀉俱水調服胸傷憂悶無熱者或酒或水調服有熱者酒水各半調服病後輒弱酒水各半調服胸肉傷心痛風寒氣痛吐蛔咯血吐血皆水調服毒蛇毒蟲傷不拘酒水服刀箭瘋犬毒物傷以粉敷瘡口外以布包卽愈俱

見本草補

本草綱目拾遺卷二終